

# MARKUQ

## é Gabú Danglù Laiká

### (The Gospel of Mark)

*Yesuq É Matú Hkyô Htong Byí É Hkyô  
Mht 3:1-12; Luk 3:1-18; Yhn 1:19-28*

<sup>1</sup> Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, <sup>2</sup> haû myiqhtoi Esai-aq laiká má:

"Náng é hkyô lajang lánq râ matú, Ngá é lagyo lé,  
Náng é hí má Ngò nhang kat râ nghut lhê."✠  
ga luí le,

<sup>3</sup> "Haû yoso má, byù rayuq garû taí é htê gi,  
'Haû Yhumsing é matú, hkyô hen to keq; Yhâng é  
matú hkyô lhoq nyhang to keq.'"✠

ga luí le, kê tô é eq rajung za nghut lhê. <sup>4</sup> Haû mù,  
Wui-myhup Sará Yohan gi, yoso hkaû má jé lé luí,  
wui-myhup hkâm byí nyi é eq, yubak mara hkyut  
pyám byí é hui râ matú myit lhîng mù, wui-myhup  
hkâm yù râ hkyô lé, hko kyô nyi ri. <sup>5</sup> Haú hkûn,  
Yuda mau jowò hkanqmó mâ é bang eq Yerusalem  
wà mó mâ é banshoq bang gi, yhâng chyáng htoq e  
bum akô. Yhangmoq gi, yhumsing é mara lé yín  
yú kôluí, yhâng chyáng mai Yodan lánq má wui-  
myhup hkâm yu bum akô nghut ri. <sup>6</sup> Yohan gi,  
gola-uq shomaú èq saí é mebu wut mù, yhâng é  
hpyidum má gi shokuq hpyihit hit ri; yhang gi,  
dînggám eq yosô byo-î pé lé zo sù nghut ri. <sup>7</sup> Yhang

✠ 1:2 Mal 3:1 ✠ 1:3 Esai 40:3

taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lhang a gingdán é nghut lhê. <sup>8</sup> Ngò gi, nungmoq lé, wui èq za wui-myhup wó hkám byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gâ ri.

*Yesuq, Wui-myhup Hkâm Yu É Hkyô Eq Gunglaú Huí É Hkyô*

*Mht 3:13-17; 4:1-11; Luk 3:21-22; 4:1-13*

<sup>9</sup> Haú yoq má, Yesuq gi, Galile mau Nazaret và mai lé jé mù, Yohan chyáng Yodan làng má wui-myhup hkâm yu ri. <sup>10</sup> Yesuq gi, wui mai htoq lo é u lé, mauhkúng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. <sup>11</sup> Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkúng mai dangtê htoq lo ri.

<sup>12</sup> Haú hkûn jáng, Woi-nyí gi, Yhang lé yoso shut wang e ló nhang ri. <sup>13</sup> Haú mù, Yhang gi, yoso má myi xê nyí nyi luí, Tsadán èq gunglaú é huí ri; tân jung yosô zè pé le, Yhang eq rahá nghut nyi ri; maumang lagyô pé gi, Yhang lé, lé dojaú nyi akô nghut ri.

*Sâng-hi Lhê É Chángzô Pé*

*Mht 4:12-22; Luk 4:14-15; 5:1-11*

<sup>14</sup> Yohan htóng gyó é htâng má, Yesuq gi, Galile mau má ló jé mù, <sup>15</sup> "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù,

haû gabú danglù lé lumjǐng keq hkoi." ga luí, Garai Gasâng é gabú danglù lé hkô kyo wún ri.

<sup>16</sup> Yesuq gi, Galile nhông yàm mai sô lai ló le, Simun eq yhanggu Andre nhiktâng, nhông má gùn dú nyí kô é lé, myang ri; haû nhik gi, ngozo kóng zo su nhik nghut akô. <sup>17</sup> Haû mù, Yesuq gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. <sup>18</sup> Haû hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

<sup>19</sup> Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhai hkaû má gùn hpo nyí kô é lé, myang ri. <sup>20</sup> Haû hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhangwa Zebedi eq langchyâng pé lé, lhai hkaû má nyhi pyâm to kôluí, Yhang htâng cháng bekô nghut ri.

### *Nat Lé, Yesuq Hkat Htoq Pyâm É Hkyô*

#### *Luk 4:31-37*

<sup>21</sup> Yhangmoq gi, Kaperna-um wà má e akô; Bánno buinyí nyí jé jáng, Yesuq gi, tarajong má wang é mù, mhoqshit hi ló bê nghut ri. <sup>22</sup> Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. <sup>23</sup> Haû u lé, agè ashop é nat wang júng é byù rayuq tarajong má bo lom nyí luí, wut garú kat é gi, <sup>24</sup> "Nazaret wà byù Yesuq ê, ngamoq gi, Nàng eq haí sêng lhê lhú? Ngamoq lé lhoq hten râ matú, Nàng jé lé é nghut

lhê lhu? Nang gi, Garai Gasang é Chyoiyung Sû nghut é lé, ngò sê lhê." gâ ri.

<sup>25</sup> Haú hkûn, Yesuq gi, "Hkâjop, yhang chyáng mai htoq ló aq." ga yhang lé tân kat ri. <sup>26</sup> Haú hkûn, agè ashop é nat haú gi, byù haú yuq lé wum kat langhtân nhâng luî, htê mó èq garu uchyang htoq ló byuq bê nghut ri.

<sup>27</sup> Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang wá nghut lhê lhu? Ahko ahkáng bo é đông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lhang gyo byî akô nghut ri." ga luî, taî lhûm bum akô nghut ri. <sup>28</sup> Yesuq eq sêng é ludang gi, Galile mau jâm shoq, yang é đông byo myín ló bê nghut ri.

*Byù Myo Myo Lé, Yesuq Lhoq Gê Byî É Hkyô  
Mht 8:14-17; Luk 4:38-41*

<sup>29</sup> Yhangmoq gi, tarajong mai htoq luî, haú hkûn jáng, Yakuq eq Yohan nhik le mù, Simun eq Andre nhiktâng é yhûm má wang e ló bekô nghut ri.

<sup>30</sup> Simûn é yhâng-aumó gi, gyai yhang nò leq tô é nghut mù luî, yhangmoq gi, Yesuq lé haú yuq no é hkyô lhom taî kyô akô nghut ri. <sup>31</sup> Haú mù luî, Yesuq gi, yhâng chyáng huî ê mù, yhâng é loq má zui luî tu tsung ri; haú hkûn jáng, nò ge byuq luî, yhang gi, yhangmoq lé gaí tso gaí huq bê nghut ri.

<sup>32</sup> Haú nyí buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyáng shuî lé lo bum akô nghut ri. <sup>33</sup> Rawa bang, hkúmdong nàm má lé zup zing tô akô. <sup>34</sup> Haú mù, Yesuq gi, awáng nòhpyo ajung jung huî é bang

myo myo lé lhoq gê byî ri; nat gang myo myo lé le, hkat htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

<sup>35</sup> Yesuq gi, htang napkyó mau lhang a bó shimá, toq mù, gaû é jowò ralhum má htoq ê luî, kyû ê dúng ri. <sup>36</sup> Simun eq yhang é luzúm wuî kúm gi, Yhang lé châng hô kômù, <sup>37</sup> Yhang lé myang hô kôjáng, "Yuq hkgámó gi, Nang lé châng hkat ho nyi akô." ga luî, taí kyô akô nghut ri.

<sup>38</sup> Haú hkûn, Yesuq gi, yhangmoq lé, "Awui ayàm mâ é wà pé má le, ngò, mungdang wó hkô râ matú é sháng, hau é matú ngò lé é ru nghut lhê." ga tû taí ri. <sup>39</sup> Haú mù luî, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byî wún ri.

*Manggâm Dap Sû Lé, Yesuq Lhoq Gê Byî É Hkyô  
Mht 8:1-4; Luk 5:12-16*

<sup>40</sup> Manggâm dap é byù rayuq gi, Yesuq chyáng lé mù, hkyihput htuq luî, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

<sup>41</sup> Haú hkûn, Yesuq gi, yhang lé wú shogyo luî, loq lham kat mù, haú yuq lé ê záng luî, "Ngò dóng lhê, sân-yúng aq hkoi." ga taí ri. <sup>42</sup> Haú hkûn jáng, manggâm ana byuq byuq luî, yhang gi, gè bê nghut ri.

<sup>43-44</sup> Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi

aq." ga, yhang lé gyai yhang sidiq byi mù, radá dâm nhang kat bê nghut ri. <sup>45</sup> Nghut kôhlang, haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaû má de de a ge wang ló lo mù, shinggan mâ é chamchuyiyuè dut é jowò má za nyi nyi ri. Nghut kôhlang, byu pé gi, jowò hkangmó mai Yhâng chyáng ru zîng lé nyi bum ashî kó nghut ri.

## 2

### *Gùngjum Shî Sû Lé, Yesuq Lhoq Gê Byî É Hkyô Mht 9:1-8; Luk 5:17-26*

<sup>1</sup> Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhúm dum taú jé lô bê gâ é hkyô lé, byu pé wó gyô bum akô nghut ri. <sup>2</sup> Haú mù, byù myo myo zîng lé lô kôluí, yhúmhkaû má jowò a joq lô é htoq agó, hkumtot má lháng a joq lo nghut ri; Yesuq gi, yhangmoq lé mungdang hko kyô nyi ri. <sup>3</sup> Haú hkûn, byù myi yuq gi, gùngjum shî sù rayuq lé chôm dang waq luí, Yhâng chyáng lé lo akô. <sup>4</sup> Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq mâ é yhumhkûng lé dong htông yù luí, gùngjum shî sù lé taphkang eq roq hkyô kat akô nghut ri. <sup>5</sup> Yesuq gi, yhangmoq é lumjîng myit lé byu-myàng jáng, gùngjum shî sù lé, "Ngá zo ê, náng é yubak mara lé hkyut pyám byi bê." ga taí ri.

<sup>6</sup> Haú hkûn, tarâ sará pé ra-am gi, haú má zung to kôluí, yhangmoq é i-myt unghkaû má, <sup>7</sup> "Byù shí yuq gi, haí mù luí haú su gâ lhê laq? Yhang gi, Garai Gasang lé rhoi dang taí nyi ri; Garai Gasang

mai lai lui, ó yuq wá mara wó hkyut byi râ lúhú?" ga lui, myit són wuî nyi bum akô nghut ri.

<sup>8</sup> Yesuq gi, yhangmoq é unghkaû má myit wú nyî kô é hkyô lé, radá dâm Yhang é myit mai sé mù, "Nungmoq é i-myit hkaû má, haî mù haû su nghû myit són wuî nyi bum akô lúhú? <sup>9</sup> Haû gùngjum shî sù lé, 'Náng é yubak mara lé hkyut pyám byi bê.' nghû taî é dang eq, 'Toq aq, náng é taphkang lé yù mù, hkyô so aq.' nghû taî râ má, hká hkun je taî lui lhê lúhú? <sup>10</sup> Nghut kôlhang, haû Byu Yhangzo\* gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga, yhangmoq lé taî kat ri. <sup>11</sup> Hau htâng, Yhang gi, haû gùngjum shî sù lé, "Ngò, nang lé taî bá, toq aq, náng é taphkang lé yu chúng lui, yhûm taû ló aq hkoi." ga taî ri. <sup>12</sup> Haû yuq gi, toq mù, yhâng é taphkang lé yu chúng lui, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkanmó gi, mauhong bùm kômù, "Isû é hkyô gi, hkâ-nhâm lháng a myàng wú shi." ga, Garai Gasang lé hkya-on kungton bum akô nghut ri.

### *Lewiq (Mahte) Lé Wut Yu É Hkyô*

*Mht 9:9-13; Luk 5:27-32*

<sup>13</sup> Yesuq gi, nhông yàm má radàm dum htoq e ri. Haû hkûn, byù moq mó gi, Yhâng chyáng jé lé lo bùm kômù, Yhang gi, haû bang lé lhom mhoqshit nyi ri. <sup>14</sup> Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang

---

\* **2:10** Byu Yhangzo gà é gi, Yesuq Yhânggùng yhang lé le taî é nghut lhê, Mesaia lé le taî é nghut lhê.

kat luî, "Ngá htâng cháng aq." ga taî ri. Haú hkûn, Lewiq gi, toq luî, Yhang htâng cháng bê nghut ri.

<sup>15</sup> Yesuq gi, Lewiq é yhûm má myinzang é zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gà le, Yhang htâng châng é bang gi, ajùm ayò nghut é yanmai nghut ri.

<sup>16</sup> Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haî mù luî, kang guq bang eq yubak dap bang eq rahá zo shuq nyi lhê lú?" ga myî bum akô nghut ri.

<sup>17</sup> Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nòhpyo hui bang za sheq ru râ lhê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taî kat ri.

### *Zoshuq Gám É Eq Sêng É Hkyô*

#### *Mht 9:14-17; Luk 5:33-39*

<sup>18</sup> Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haî mù a gám kô é lú?" ga luî, myî akô nghut ri.

<sup>19</sup> Haú hkûn, Yesuq tû taî é gi, "Bíng pé gi, lusik eq rahá nghut nyi tô ashî hkûn, zoshuq hkâsu wó gám râ lú? Yhangmoq gi, lusik eq rahá nghut nyi é u lé, zoshuq gám kó râ a nghut. <sup>20</sup> Nghut kôlhang, lusik lé yhangmoq chyáng mai shuí yu



pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

<sup>21</sup> Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê. <sup>22</sup> Haú eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq râ nghut lhê. Haú mù, tsibiyiq wing asik gi, shokuq htûng sik má za ge kat é nghut lhê.

### *Bánno Buinyi É Yhumsîng*

#### *Mht 12:1-14; Luk 6:1-11*

<sup>23</sup> Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô láí ló é hkûn, Yhâng é chángzô pé gi, kyôshi ratsuí langshap yu akô nghut ri. <sup>24</sup> Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lú?" ga taí akô.

<sup>25</sup> Haú hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lú?"

<sup>26</sup> Abiahta, hkyangjong mó kut nyi é u lé, Dawiq gi, Garai Gasâng é yhúmhkaú má wang ê mù, hkyangjong pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tû taí ri.

<sup>27</sup> Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. <sup>28</sup> Haú mù, haú Byu

Yhangzo gi, haú Bánno buinyi é Yhumsîng lhang nghut lhê." ga xoq taî ri.

### 3

<sup>1</sup> Yesuq gi, tarajong má radàm dum wang e le, loq raloq ajum shi byuq é byù rayuq nyi to lánq ri.

<sup>2</sup> Haú hkûn, haú má nyi tô é bang ra-am gi, Bánno buinyi má, Yesuq mai haú yuq lé lhoq gê byi râ lú ga, mara hún râ matú gyám wú nyi akô nghut ri.

<sup>3</sup> Yesuq gi, haú loq jum shî sù lé, "Banshoq bâng é hí má, toq yap shit aq." ga taî kat ri.

<sup>4</sup> Hau htâng, Yhang gi, haú má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyî râ eq byù sat râ hkyô pé má, hká lhum kut le sheq tarâ wang lhê lú?" ga myî kat jáng, yhangmoq kúm gi, jit le a ga kó nghut ri.

<sup>5</sup> Haú mù, Yhang gi, nhik-yô nau é myit eq haú bang lé lhang wú mù, yhangmoq myit htan é hkyô lé, wú yón luî, haú loq jum shî sù lé, "Náng é loq nyhang kat aq." ga taî kat jáng, haú yuq gi, loq nyhang kat luî, yhâng é loq gi, shoq za ge byuq bê nghut ri. <sup>6</sup> Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhûm bum akô nghut ri.

#### *Byù Ajùm Ayò, Yesuq Htâng Cháng Kô É Hkyô*

<sup>7</sup> Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri. <sup>8</sup> Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui

ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. <sup>9-10</sup> Yesuq gi, byù myo myo lé lhoq gè byî é yanmai, nõhpyo hui to bang gi, Yhang lé wó záng shoq ga, chyîn chyap wang ló bum akô. Byù lùm myo luî, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhaî ralhum hen to nhang ri. <sup>11</sup> Agè ashop é nat pé gi, Yhang lé myàng hkangmó, Yhâng é hí má lêng ngop to luî, "Nàng gi, Garai Gasâng é Yhangzo nghut ri." ga luî, taî garû akô. <sup>12</sup> Nghut kôlhang, Yesuq gi, Yhang ó yuq nghut é hkyô lé a taî byông htoq râ matú, tân hkúm kat ri.

*Lagyo Kut Râ Byù Raxe Í Yuq Hkyin Yu É Hkyô  
Mht 10:1-4; Luk 6:12-16*

<sup>13</sup> Yesuq gi, bùm shut doq ló mù, Yhang ô nau é bang lé ji kat luî, haú bang gi, Yhâng chyáng jé lé lo bum akô nghut ri. <sup>14</sup> Haú hkûn, Yesuq gi, byù raxe í yuq lé hkyin yù luî, lagyo ayá byî ri; haú bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq, <sup>15</sup> nat gâng pé lé hkat htoq râ ahko ahkáng wó râ matú le, nghut akô nghut ri. <sup>16</sup> Haú raxe í yuq gi, Simun (Yesuq mai Petruq ga myìng myhíng byi sù); <sup>17</sup> Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga myìng myhíng byi ri; hau é lichyúm gi, maugum zô nhik gâ é nghut lhê.); <sup>18</sup> Andre, Hpilip, Barhtol-ume, Mahte, Htomaq, Alhpe é yhangzo Yakuq,

Htade, Zelutuq\* dut é Simun eq, <sup>19</sup> Yhang lé ap pyám râ sù, Yudaq Iskarut pé nghut akô.

*Yesuq Eq Bezebulaq*

*Mht 12:22-32; Luk 11:14-23; 12:10*

<sup>20</sup> Hau htâng, Yesuq gi, yhûm má wang ló le, byù ajùm ayò dum zîng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri. <sup>21</sup> Yhâng é yhumbyù wuì gi, haú hkyô lé wó gyo kôjáng, "Yhang, myit a gying lo nghut ri." ga luì, Yhang lé hung shuí yù râ matú, e akô nghut ri.

<sup>22</sup> Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaù é wum-o a-tsam èq za, nat gâng pé lé hkat htoq pyâm é nghut ri." ga taí bum akô nghut ri.

<sup>23</sup> Haù mù luì, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq râ lhú? <sup>24</sup> Mingdán ralhum gi, ahkaù má byoq gâng lhûm nyi kô é nghut jáng, mingdán haú wó gîng nyi râ a nghut. <sup>25</sup> Yhumhtu ralhum má le, ikun byù yhangchang byoq gâng lhûm nyi é nghut le gi, yhumhtu haù wó gîng nyi râ a nghut. <sup>26</sup> Haù eq rajung za, Tsadán le, yhânggùng yhang lhoq hpyoq luì, gam hkoq nyi é nghut le gi, yhang wó nyi nyi râ a nghut, htûm byuq râ za nghut lhê. <sup>27</sup> Ó yuq nghut kôle, wum-o bò sù lé hí tui zing pyâm é a nghut le gi, yhâng é yhûm má lú wâng mù, yhâng é sutzè lé wó lú yù râ a nghut: Haú

\* **3:18** Zelutuq gâ é lichyúm gi, yhumsîng zui saí é hkyô má gyai yhang myit lôm shirong é sù lé gâ lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

yuq lé hí tuî zing pyám jáng sheq, yhâng é sutzè lé wó lú yû râ nghut lhê. <sup>28</sup> Ngò, nungmoq lé teng za taí kôlé, byu pé kut shut é mara banshoq eq rhoî dang taí pyâm é pé lé gi, mara wó hkyut pyám byî lhê. <sup>29</sup> Nghut kôhang, haû Chyoiyúng Woi-nyí lé rhoî dang taí pyâm é sù gi, hkâ-nhám le, mara hkyut byî é wó hui râ a nghut; haú yuq gi, ahtum abyuq yubak wó sù nghut nyi ri." gâ ri.

<sup>30</sup> Yhang haû su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

*Yesuq É Yhângnu Eq Yhanggu Pé  
Mht 12:46-50; Luk 8:19-21*

<sup>31</sup> Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô râ matú, byù rayuq lé wang taí nhang akô nghut ri. <sup>32</sup> Byù ajùm ayò gi, Yhâng é lhînghkyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naû luí, shinggan má lánq bum akô." ga taí kyô akô nghut ri.

<sup>33</sup> Haú hkûn, Yhang gi, "Ô pé gi, Ngá nu eq Ngá gu pé nghut akô lhú?" ga myi kat ri.

<sup>34</sup> Hau htâng, Yhang gi, Yhâng é lhînghkyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wuì nghut bê! <sup>35</sup> Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

## 4

*Kyôshi Sân É Dangtú**Mht 13:1-23; Luk 8:4-15*

<sup>1</sup> Yesuq gi, nhông yàm má radàm dum mhoqshit hi ló bê nghut ri. Haú hkûn, Yhâng é lhîngkyuq má byù moq mó lûm yán zîng lé lo bùm kô é yanmai, Yhang gi, nhông hkaû mâ é lhaí má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri. <sup>2</sup> Yhang gi, haú bang lé, dangtú pé dông myo myo mhoqshit byî nyi ri; Yhang mhoqshit é má, <sup>3</sup> "Gyo wú keq! Kyô hkyó sù rayuq gi, kyôshi san râ gâ htoq e ló ri. <sup>4</sup> Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri. <sup>5</sup> Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq ló kôle, <sup>6</sup> amyit a wó chîn hing é nghut mù, bui htoq lô jáng, lhap kyuq pyám bê nghut ri. <sup>7</sup> Dum ra-am gi, zugyóm hkaû má gyó ang luî, zubyap haú pé kô lò mù, wup pyâm é yanmai, ashi a wó zui nghut ri. <sup>8</sup> Nghut kôlhang, ra-am gi, myìhpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

<sup>9</sup> Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

<sup>10</sup> Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myí akô. <sup>11</sup> Haú hkûn, Yhang, yhangmoq lé taí kyô é gi, "Garai Gasâng é mingdán eq sêng é sê gyo wuî é hkyô lé sé gyo râ ahko ahkáng, nungmoq lé byî to lugù nghut bê.

Nghut kôlhang, góbâng é matú gi, jung hkgangmó lé dangtú dông chyat taí é nghut lhê. <sup>12</sup> Haû mù luí, 'Yhangmoq gi, myang nyì kôlhang, a wú sé kó, gyô nyì kôlhang, a sê gyo kó; sé wú sê gyo kô é ru nghut le gi, lhîng taû lò mù, mara hkyut pyám byî é hui kó râ nghut lhê! ✧  
gâ ri." ga tô ri.

<sup>13</sup> Hau htâng, Yhang, yhangmoq lé dum xoq taí é gi, "Nungmoq, dangtú shî lé a sê gyo kô é nghut le gi, gotû dangtú pé lé hkâsu kut ung sê gyo kó râ lhú? <sup>14</sup> Yò mù zui sù san kat é kyôshi gi, mungdang nghut lhê. <sup>15</sup> Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byî ri. <sup>16</sup> Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit èq hap yù akô. <sup>17</sup> Nghut kôlhang, yhangmoq gi, amyit a wó chîn é yanmai, razup zo za yuq kômù, mungdâng é yanmai, wuîhke é eq zing-rí é pé hui kôjáng, hân hân htak ló byuq kó râ nghut lhê. <sup>18</sup> Dum ra-am nghut jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kôlhang, <sup>19</sup> shí ipyat lhê é myit wui myit hke hkyô, hkyô shuî ngoq jung ngùn hîng zèhkoq eq gotû zè pé lé ô nau é hkyô pé, yhangmoq chyáng wang lò jáng, haû mungdang lé hup pyâm é yanmai, ashi a wó zui dut kó râ nghut lhê. <sup>20</sup> Ra-am kúm gi, myìhpún bo é jang má gyó âng é kyôshi eq wuí akô; yhangmoq gi, haû mungdang lé gyô yù mù, lhom yù luí, sân kat é htoq sum xê

---

✧ 4:12 Esai 6:9-10

tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

### *Myibung Htûn É Hkyô*

#### *Luk 8:16-18*

<sup>21</sup> Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mûng eq nghop tô é, a nghut jáng, yhupchong ô má tsung tô é, ó yuq wá kut wú akô lú? <sup>22</sup> Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê. <sup>23</sup> Gyô yù râ nohkyap dap sù ó yuq nghut kôle, gyô yù sháng gaq." gâ ri.

<sup>24</sup> Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byí é bung eq, nungmoq lé dum lik byi râ nghut lhê; hau htoq lhang myo shoq wó kó râ nghut lhê.

<sup>25</sup> Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

### *Kyôshi Yuq Kô Lo É Dangtú*

<sup>26</sup> Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. <sup>27</sup> Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyí é hkyô lé a sé nghut ri. <sup>28</sup> Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê. <sup>29</sup> Kyôshi myhíng jáng, kyô shu yoq jé bê nghut



é yanmai, yhang gi, zaiyik èq yâm yù râ nghut lhê." gâ ri.

*Angshi Cham Lé Dangtú Yu É Hkyô*

*Mht 13:31-32; Luk 13:18-19*

<sup>30</sup> Yesuq dum xoq taí é gi, "Garai Gasâng é mingdán lé, hai èq lhoq whuî wú râ lhú? Hai jung dangtú yù mù, shit wú râ lhú? <sup>31</sup> Garai Gasâng é mingdán gi, angshi cham eq wuí ri. Angshi cham haû gi, myigùng má hô é kyômyui jí pé má je tiq é nghut lhê. <sup>32</sup> Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luî, hau é buishûm hkaû má, maulat nghoq zô pé lé wó zung nô nyi é nghut lhê." gâ ri.

<sup>33</sup> Haû sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. <sup>34</sup> Yhang gi, yhangmoq lé, dangtú a bo é haí lháng a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkgangmó é lichyúm lé taí sân kyô ri.

*Laidun Mó Lé, Yesuq Lhoq Zîm Pyâm É Hkyô*

*Mht 8:23-27; Luk 8:22-25*

<sup>35</sup> Haû nyí, myinhâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri. <sup>36</sup> Haú hkûn, chángzô pé gi, byù moq mó lé nyhi pyâm to luî, Yhang zung tô é lhaí mai yhang, Yhang lé shuí gû dap ló bekô; gotû lhaí pé le, yhangmoq eq rahá bo gû dap ló akô nghut ri. <sup>37</sup> Haú u lé, laidun mó jé lô mù, wuìlhêng hta toq lô luî, lhaí má lo bat hâng é yanmai, wuì byíng lô bê nghut ri. <sup>38</sup> Haú hkûn, Yesuq gi, lhaí

htâng má uhkuq hkuq mù yhup myhî tô ri; haû chángzô pé gi, Yhang lé nhaû pun luî "Sarâ ê, nga-nhúng myup shi ló rà dut é lé, nàng a chiq byi lú?" ga taí akô nghut ri.

<sup>39</sup> Yesuq gi, toq mù, laidun lé tan luî, wuìlhêng lé, "Zim aq." ga taí kat jáng, haû laidun num ló byuq luî, banshoq zîm byuq bê nghut ri.

<sup>40</sup> Hau htâng, Yhang gi, Yhâng é chángzô pé lé, "Haî mù, haû-í gyuq bum akô lú? Nungmoq gi, lumjîng myit a bò shi kó lú?" ga taí ri.

<sup>41</sup> Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lhê lhà? Lài eq wuìlhêng pé lháng gi, Yhâng é dang lé gyo byî ri-nhung!" ga luî, rayuq eq rayuq myî lhùm bum akô nghut ri.

## 5

### *Nat Gang Hkat Htoq Pyâm É Hkyô*

#### *Mht 8:28-34; Luk 8:26-39*

<sup>1</sup> Yhangmoq gi, nhông hé hpoq mâ é Gerase byu pé é mau má jé dap e ló akô. <sup>2</sup> Yesuq lhai mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huî ri. <sup>3</sup> Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuî èq lháng a wó tuî zing wú kó nghut ri. <sup>4</sup> Hkâsu mù gâ le, adàm dàm, yhâng é loq eq hkyî má shamtoq-tuî èq tuî tô wú kôhang, yhang gi, loq mâ é shamtoq-tuî pé lé lâng hpyit pyám pyám kut mù, hkyî mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri. <sup>5</sup> Yhang gi, nyí myín aga lupdùng eq bùm pé má puk garu

uchyang, yhumsing gùng lé luqgok èq dùn cheq wún ri.

<sup>6</sup> Yhang gi, Yesuq lé, we mai myang kat jáng, din e ló mù, Yhâng é hí má hkyihput htuoq ngop lui, <sup>7</sup> htê mó èq, "Myhang htâng é Garaî Yhangzo Yesuq ê! Nàng gi, ngò eq haî sêng lhê lhú? Nàng gi, ngo lé a zing-ri râ matú, Garai Gasâng hí má danggidiq byi laq." ga taî garû ri. <sup>8</sup> Haî mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga taî kat é yanmai nghut ri.

<sup>9</sup> Hau htâng, Yesuq gi, "Náng myîng haî gâ lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lhê." ga tú taî ri.

<sup>10</sup> Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

<sup>11</sup> Haú u lé, waq rajùm mó gi, bùm yàm má dû but zô nyi bum akô nghut ri. <sup>12</sup> Haú mù lui, nat gâng pé gi, "Ngamoq lé, waq pê chyáng nhang kat lui, yhangmoq chyáng wàng nhâng laq." ga lui, Yesuq lé dung akô. <sup>13</sup> Haú hkûn, Yesuq gi, yhangmoq lé ahkáng byî kat jáng, haú agè ashop é nat pé gi, haú yuq chyáng mai htoq ló kôlui, waq pê chyáng wang ló byuq bekô nghut ri. Haú mù, haú í hkyîng kô bo é waq hpúng gi, gampyoq mai nhông hkaú shut rut din yán wang ló kôlui, myup shi byuq bekô nghut ri.

<sup>14</sup> Waq zúng bang gi, h pang din wang ló kômù, myuq hkaú mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut lai lò bê hkyô lé, ê htoq wú akô nghut ri.

<sup>15</sup> Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut lui,

byù gè rayuq su zung to lánq é lé myàng kômù, gyuq dan bùm bekô nghut ri. <sup>16</sup> Haú hkyô lé myang é bang gi, nat gâng pé wang júng sù eq waq pé chyáng hkâsu dut é hkyô, góbang lé taí kyo akô nghut ri. <sup>17</sup> Hau htâng, byu pé gi, Yesuq lé yhangmoq é mau mai htoq ló byuq râ matú, chôm dúng tôngbán akô nghut ri.

<sup>18</sup> Yesuq lhaí hkaú má wang ló é u lé, haú nat gâng pé wang júng lai lò bê sù gi, Yesuq htâng cháng râ matú, Yesuq lé dung tôngbán ri. <sup>19</sup> Nghut kôhang, Yesuq gi, yhang lé ahkáng a byi e za, "Nàng, yhùm shut sheq ló mù, haú Yhumsîng, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, náng é yhumbyù buinùm ji-myi wui lé ló taí kyo aq." ga taí kat ri. <sup>20</sup> Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli\* mau bang lé ló taí kyô ri. Haú hkûn, wó gyô é bang banshoq gi, mauhong bum akô nghut ri.

*Shi Byuq Bê Myiwe Zo Eq No É Myiwe Myhi Rayuq É Hkyô*

*Mht 9:18-26; Luk 8:40-56*

<sup>21</sup> Yesuq gi, lhaí ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhîngkhyuq má lé zîng bum akô nghut ri; <sup>22</sup> haú hkûn, Ya-iruq gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyí wang má paí gop to mù, <sup>23</sup> "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, nàng lé mù,

\* **5:20** Dekapoli gâ é gi, Grik đông myuq raxê lé gâ lhê.

yhâng é ahtoq má loq lé ke byi laq." ga, wum kat dúng tôngbán nyi ri. <sup>24</sup> Haû mù, Yesuq gi, haû yuq htâng châng e ló ri; byù ajùm ayò le, Yhâng é awui ayàm má châng chyîn chyap wún bum akô.

<sup>25</sup> Haû hkûn, raxe í zân suí yui nyi é myiwe myhí rayuq le haû hpúng má bo tô ri. <sup>26</sup> Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lháng wuîhke lò ri. <sup>27</sup> Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má ê záng kat ri. <sup>28</sup> Haî mù luí gâ le, yhang gi, "Ngò, Yhang é bu má za lháng ê wó záng é nghut le gi, ge byuq râ nghut lhê." ga wó myit é yanmai, haû su kut é nghut ri. <sup>29</sup> Haû hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

<sup>30</sup> Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lhú?" ga myi kat ri.

<sup>31</sup> Haû hkûn, Yhâng é chángzô pé gi, "Náng é lnhngkyuq má byù ajùm ayò chyîn chyap nyi é lé, myang to luí nhîng, 'Ngo lé, ó yuq záng bê lhú?' nghú myi lhê lhú?" ga tú tái kat akô.

<sup>32</sup> Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashî nghut ri.

<sup>33</sup> Haû hkûn, myiwe myhí haû gi, yhâng chyáng hkâsu dut laí lò bê hkyô lé sê é yanmai, Yesuq é hí má lé mù, gyuq nán é èq Yhang é hkyî wang má ngóm gop to luí, yhâng chyáng dut laí lò bê hkyô

banshoq lé taí kyô ri. <sup>34</sup> Haû mù, Yesuq gi, myiwe myhí haû lé, "Byizo ê, náng é lumjǐng myít gi, nàng lé lhoq gê byi bê nghut ri; náng é nôhpyo ge byuq bê nghut ri; ngón za ló aq hkoi!" ga taí ri.

<sup>35</sup> Yesuq gi, dang ru taí nyi ashî hkûn, tarajong má up sù Ya-irug é yhûm mai byù ra-am jé lé mù, "Nang é byizo gi, shi byuq bê; haî mù luî, haû sará lé lhoq hkyik nyi lhê lú?" ga luî, lé taí kat akô.

<sup>36</sup> Yesuq gi, haú bang taí é dang lé gyô lhaî pyám mù, "Hkâgyuq, za lumjǐng aq." ga, haû tarajong má up sù lé taí kat ri.

<sup>37</sup> Hau htâng, Yhang gi, Petruq, Yakuq eq Yakuq é yhanggu Yohan pé mai lai luî, ó yuq lé le, Yhang htâng a cháng nhâng nghut ri. <sup>38</sup> Yhangmoq, haû tarajong má up sù é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. <sup>39</sup> Yhang gi, yhúm hkaû shut wang ló mù, haú bang lé, "Haî mù, yón ngau gabyông nyi bum akô lú? Haû zoshâng gi, shi byuq é a nghut, yhup myhî tô é sheq ru nghut lhê." ga taí ri. <sup>40</sup> Nghut kôlhang, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luî, zoshâng lé lheq tô é gok má wang e akô nghut ri. <sup>41</sup> Yesuq gi, myiwe zo hau é loq má zuî to mù, "Talihta ku-mi" (haû é lichyúm gi, "Myiwe zo ê, ngò, nang lé taí bá, toq aq." gâ é nghut lhê.) ga taí ri. <sup>42</sup> Myiwe zo haû gi, haú hkûn jáng, toq luî, sô wún ri (yhang gi, asak raxe í zân bò bê sù nghut ri.). Yhangmoq gi, haû sù dut é hkyô lé gyai yhang maú byuq bùm bekô

nghut ri. <sup>43</sup> Yhang gi, haû hkyô ó lé le a sé nhâng râ matú, yhangmoq lé taî hkúm kat luí, myiwe zo haû lé, zô jung byi tso râ matú le, yhangmoq lé taî ri.

## 6

### *Yhumsing Wà Má Myoqdong A Wó É Hkyô Mht 13:53-58; Luk 4:16-30*

<sup>1</sup> Yesuq gi, haú jowò mai htoq e ló mù, Yhâng é yhum mau shut taû ló ri; Yhâng é chángzô pé le, Yhang eq rahá bo châng ló akô nghut ri. <sup>2</sup> Bánno buinyì jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkámá mhoq yu é lhà? Yhang wó yu é hpaqchyî byéng-yá gi, hkasû é wá nghut mù luí, laklaí kumlhá lé lháng kut lhê laq? <sup>3</sup> Shí yuq gi, Mariq é yhangzo, laksîma hpó nghut lhê, a nghut lhú? Yhang gi, Yakuq, Yose, Yudaq, Simun pê é yhangmang nghut lhê, a nghut lhú? Yhâng nhammó pé le, nga-nhúng eq rahá nghut nyi lhê, a nghut kó lhú?" ga luí, Yhang lé myit a ngón dut bùm bekô nghut ri.

<sup>4</sup> Yesuq, yhangmoq lé taî é gi, "Myiqhtoi rayuq gi, yhumsing é yhum mau, yhâng é buinùm ji-myi wuì eq yhumsing é yhùm má za, myoqdong a lhaq wó wú é nghut lhê." gâ ri. <sup>5</sup> Yhang gi, nò byù ram lé loq ke byi mù, lhoq gê byî é mai lai luí, gotû laklaí kumlhá haî le, haú má a wó kut shit nghut ri. <sup>6</sup> Haû mù, Yesuq gi, yhangmoq lumjíng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

*Lagyo Raxe Í Yuq Lé Nhang Htoq Kat É Hkyô*  
*Mht 10:5-15; Luk 9:1-6*

<sup>7</sup> Yesuq gi, haû lagyo raxe í yuq lé wut yù mù, agè ashop é nat pé lé ûng râ a-tsam byi luî, í yuq yuq kut nhang htoq kat ri.

<sup>8</sup> Yhang, yhangmoq lé châng pying kat é dang gi, "Hkyowui é matú má, dumbáng mai lai luî, zoshuq le, etap le, ngùn le, gotû haî le, hkâyü chûng kó; <sup>9</sup> hkyî-tsung kúm gi, tsûng chûng keq; nghut kôlhâng, bu í dung hkâwut chûng kó. <sup>10</sup> Hká má nghut kôlhâng, rayhûm yhûm má nungmoq wang bíng kô é nghut le gi, haú wâ mai dum htoq ló é buinyì jé shoq, haú yhûm má za nyi nyì keq. <sup>11</sup> Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

<sup>12</sup> Haû mù, yhangmoq gi, htoq e ló luî, myit lîng râ é hkyô, byu pé lé hkô kyô akô. <sup>13</sup> Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xû but byi luî, lhoq ge byi akô nghut ri.

*Yohan, Ulhum Hpyit Huí é Hkyô*  
*Mht 4:1-12; Luk 9:7-9*

<sup>14</sup> Yesuq é myìng hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ram gi, "Shí yuq gi, haû shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luî, taî bum akô nghut ri.



15 Ra-am gi, "Yhang gi, Eliyaq nghut ri." ga taî akô nghut ri.

Dum, ra-am taí kô é gi, "Yhang gi, hí hpyang lhê é myiqhtoî pé su, myiqhtoi rayuq nghut ri." gâ ri.

16 Herut kúm gi, haú lé wó gyo jáng, "Ngò, ulhum hpyit pyám byî é Yohan gi, shi é mai dum dui toq bu-nhung!" ga taî ri.

17 Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuî yù nhâng mù, htóng hkyô pyám nhang wú é sù nghut lhê. 18 Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luî, taí byî nyi é yanmai nghut ri. 19 Haû mù, Herudiaq gi, Yohan lé gyai a jú dut byuq luî, sat pyám naû kôlhâng, a wó sat dut nyi ri. 20 Haî mù gâ le, Herut gi, Yohan, dingmán chyoiyúng é sù nghut é lé sé mù luî, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhâng, yhang taî é dang pé lé ru gyô nau nyi ashî nghut ri.

21 Nghut kôlhâng, Herut gi, yhâng é hkû ladu hkyúm buinyì má, byù mó pé, gyezau pé, Galile mau suwún wui pé lé, ji yù mù zoshuq poî mó kut é yanmai, haú nyí gi, Herudiaq é matú, buinyì gè dut bê nghut ri. 22 Herudiaq é yhangzo byizo gi, wang lé lô mù, gó shit é hkûn, Herut eq yhâng é bing pé gi, myit gón bum akô nghut ri.

Haû mù, hkohkâm gi, myiwe zo haû lé, "Nàng ô nau é haî nghut kôle, dung aq, ngò nàng lé byi râ nghut lhê." ga, dakam é danggidiq byî ri. 23 Hau htoq agó, yhang gi, myiwe zo haû lé, "Nàng dung é

haî nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byî ri.

<sup>24</sup> Haú hkûn, myiwe zo haû gi, htoq ló mù, yhâng nu lé, "Haî dúng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tû taî kat ri.

<sup>25</sup> Myiwe zo haû gi, radá dâm hân hân wang ló mù, hkohkâm lé, "Ahkuî yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

<sup>26</sup> Haû su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, myiwe zo haû taî é dang lé a kâm he pyám lo nghut ri. <sup>27</sup> Haû mù, hkohkâm gi, zúng é gyezo rayuq lé, Yohan é ulhum ê hpyit lô râ matú, radá dâm hkunmó hkyó mù nhang kat ri. Haû mù, haú yuq gi, htóng hkaû má ê luî, Yohan é ulhum lé, ê hpyit mù, <sup>28</sup> bó má kat luî, myiwe zo haú lé lo byî ri; myiwe zo haû gi, ulhum haû lé, yhângnú chyáng yu ló byî ri. <sup>29</sup> Yohan é chángzô pé gi, haú hkyô lé wó gyo kôjáng, yhâng é mâng lé lé yû luî, lup má ló myhup pyám bekô nghut ri.

*Byù Ngo Hkyîng Lé Byi Tsô É Hkyô*

*Mht 14:13-21; Luk 9:10-17; Yhn 6:1-14*

<sup>30</sup> Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoqshit bé hkyô pé banshoq, Yhang lé taî kyô akô nghut ri.

<sup>31</sup> Hau htâng, byù myo myo gi, yhangmoq chyáng htoq htoq wàng wàng kut nyî kô é yanmai, yhangmoq gi, zang zo ahkyíng lháng a wó kó nghut ri.

Haû mù, Yesuq gi, chángzô pé lé, "Nga-nhúng, tsím tsâm é jowò ralhúm má é mù, ê nô yù sháng." ga taî ri.

<sup>32</sup> Haû mù, yhangmoq gi, yhangmoq baú lhaî racham má ji mù, tsím tsâm é jowò shut e ló akô nghut ri. <sup>33</sup> Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluî, wà hkangmó mai hkyî hkyô châng din ê kômù, yhangmoq é hí má jé to lánq akô nghut ri.

<sup>34</sup> Yesuq gi, lhaî mai gyó dap ló é hkûn, byù moq mó nyi to lánq lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luî, myo myo mhoqshit byî hi ló bê nghut ri.

<sup>35</sup> Buì gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, buì le gyum ló bê; <sup>36</sup> yhangmoq gi, awui ayàm mâ é yhùm pé eq wà pé má, zoshuq ló ho wuî zo kó sháng gaq, yhangmoq lé ló nhâng aq hkoi." ga taî akô nghut ri.

<sup>37</sup> Haú hkûn, Yhang gi, "Nungmoq, yhangmoq lé rajung jung byi tso keq." ga tû taî jáng, yhangmoq gi, "Shî myhó é bang zo râ matú, ngamoq gi, ê luî, denari\* í sho èq muk é wuî byi ra râ luq?" ga dum taû myî akô nghut ri.

<sup>38</sup> Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myî ri. Haû mù, yhangmoq gi, myang hô jáng, "Muk ngo long eq ngozo í du wó lhê." ga, dum tû taî akô nghut ri.

---

\* **6:37** Denari rachap gi, byù rayuq é ra-nyî lhê é zuihpau eq wui ri.

<sup>39</sup> Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhâng é chángzô pé lé taí kat ri. <sup>40</sup> Haú mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri. <sup>41</sup> Yesuq gi, haú muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri. <sup>42</sup> Yhangmoq banshoq bang gi, zô gyí bùm bekô nghut ri. <sup>43</sup> Hau htâng, haú chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. <sup>44</sup> Haú hkùn, zô é bang gi, yuqgè wuì baú lhang, byù du ngo hkyíng nghut ri.

*Yesuq, Wuì Htoq Má Sô É Hkyô*

*Mht 14:22-33; Yhn 6:15-21*

<sup>45</sup> Yesuq gi, haú shiwa byu pé lé byo ló nhang nyi é hkùn jáng, Yhâng é chángzô pé lé lhai má wang ji nhâng mù, tú tap mâ é Bet-saida wà mó shut dap ló lán nhang ri. <sup>46</sup> Yhangmoq lé shi-kyâm kat é htâng, Yhang gi, kyúdung râ ga, Yhang baú bùm shut doq e ló bê nghut ri.

<sup>47</sup> Buigyum htâng, lhai gi, nhông gùng má jé tô é u lé, Yesuq gi, Yhang baú za myì htoq má nyi tô ashí nghut ri. <sup>48</sup> Làì tau mut é yanmai, haú chángzô pé gi, lhai lhu wuìhkê nyi kô é lé, Yesuq myang ri. Napsún maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai láì ló râ dâ ri. <sup>49</sup> Nghut kôlhang, yhangmoq gi, Yhang,

nhông htoq má sô nyi é lé myang kôjáng, sobyô su ngàm kômù, kyek garû bum akô nghut ri. <sup>50</sup> Hkâsu mù gâ le, yhangmoq banshoq bang gi, Yhang lé myang kôluî, gyuq dàn kô é yanmai nghut ri.

Nghut kôhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gâ ri. <sup>51</sup> Hau htâng, Yhang gi, lhaî htoq má yhangmoq eq rahá ê doq ji jáng, lai gi, zîm byuq bê nghut ri; haû mù, yhangmoq gi, gyai yhang mauhong byuq bùm bekô nghut ri. <sup>52</sup> Hkâsu mù gâ lé, yhangmoq gi, muk gam é laklai kumlhá eq séng luî a sê gyo kô é htoq agó, myitbun a bóng kô é yanmai nghut ri.

<sup>53</sup> Yhangmoq gi, gû dap ló kômù, Genesarat mau má jé wang lò jáng, lhaî lé haû má ló shap tô akô nghut ri. <sup>54</sup> Yhangmoq lhaî mai gyó é hkûn jáng, byu pé gi, Yesuq lé lhom wú sê akô nghut ri. <sup>55</sup> Haû mù, yhangmoq gi, haû mau ramau gón má din jón mù, nò bang lé taphkang mai waq luî, Yesuq nyi rí gâ é jowò hkangmó má, shuî lé lo bum akô nghut ri. <sup>56</sup> Yesuq jé é wà hkangmó, myuq hkangmó, awui ayàm mâ é wà hkangmó pé má, yhangmoq gi, nò byù lé gài pé má lé lheq to kôluî, Yhâng é bushi htâng má za lháng, haû bang lé byi záng nhâng râ matú, Yhang lé dúng tôngbán akô. Yhang lé záng é lhunglhâng bang gi, lhoq gê byî é huî akô nghut ri.

## 7

### *A Sanséng Dut Nhang É Hkyô Pé*

#### *Mht 15:1-20*

<sup>1</sup> Haû Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm

má lé zup zîng bum akô. <sup>2</sup> Haú hkûn, Yhâng é chángzô pé ra-am gi, htûngli dông a chí pyâm é, a sansêng é loq èq zo shuq nyî kô é lé, yhangmoq myang akô nghut ri. <sup>3</sup> (Hparishe pé eq Yudaq byù banshoq bang gi, yhangmoq é îchyi îwâ pê é htûngli lé châng é bang nghut lhê mù luî, loq hí a chí é gi, haî le a zô wú kó nghut ri. <sup>4</sup> Yhangmoq gi, gài pé mai taù lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chòkon pé lé chí é htûngli gotû pé lé le, châng akô nghut ri.)

<sup>5</sup> Haù mù, Hparishe pé eq tarâ sará pé gi, Yesuq lé, "Náng é chángzô pé gi, haî mù luî, îchyi îwa pê é htûngli lé a châng e za, a sansêng é loq èq zo shuq nyi akô l hú?" ga myî akô.

<sup>6</sup> Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luî myiqhtoi Esai-aq htoî tô é dang má, 'Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngò eq wê gâng nyi akô.

<sup>7</sup> Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri. ✧

ga kê tô é gi, têng ri. <sup>8</sup> Nungmoq gi, Garai Gasang tô tô é hkunmó lé tô pyám luî, byu é htûngli lé za, myhik zing tô akô nghut ri." ga luî tû taî ri.

<sup>9</sup> Hau htâng, Yhang xoq taî é gi, "Nungmoq gi, yhumsing é htûngli lé za châng râ matú, Garai Gasâng é hkunmó lé he-ngik pyâm é má, hpaqchyî gyaí bo akô nghut ri. <sup>10</sup> Hkâsu mù gâ le, Mosheq

gi, 'Nungmoq é înu îwa lé, hkungga keq.'<sup>✧</sup> ga le, 'Înu îwa lé, nhîng é sù ó yuq nghut kôle, sat pyâm é hui râ lhê.'<sup>✧</sup> ga le, kê tô é nghut lhê. <sup>11</sup> Nghut kôlhang, nungmoq taî é gi, byù rayuq yuq, yhum-sing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê gá nhang akô. <sup>12</sup> Haû mù, haú yuq lé, yhângnu yhângwâ é matú, haî a kut byi nhâng lô é đông dut bê nghut ri. <sup>13</sup> Haú đông mai, nungmoq gi, nungmoq chung gyó lo é htôngli é yanmai, Garai Gasang é mungdang lé he-ngik pyâm akô; haû sù é hkyô myo myo lé le, nungmoq kut akô nghut ri." gâ ri.

<sup>14</sup> Yesuq gi, shiwa byu pé lé Yhâng chyáng dum wut yù mù, taî é gi, "Nungmoq banshoq bang, ngò taî é lé gyô yù mù, sé lo keq; <sup>15</sup> Shinggan mai wang lo é haî jung le, byù lé a sanséng dut nhang é a nghut, nghut kôlhang, byu é unghkaû mai htoq ló é zè kúm gi, byù lé a sanséng dut nhang lhê." gâ ri. <sup>16</sup> (Gyo râ nohkyap dap é sù gi, gyô yù sháng gaq.)" ga taî ri.\*

<sup>17</sup> Yhang gi, byù moq mó mai htoq ló mù, yhúmhaû má jé wang ló é hkûn, Yhâng é chángzô pé gi, dangtú haû eq séng luí, Yhang lé lhom myí akô nghut ri. <sup>18</sup> Haû mù, Yhang gi, yhangmoq lé, "Nungmoq gi, haû-í yhang go akô luq? Shinggan mai wang lo é haî jung le, byù lé a sanséng nhâng wó dut râ a nghut é hkyô lé, a sé kó lhú? <sup>19</sup> Hkâsu mù gâ lé, haû gi, byu é myít nhiklhum hkaû má wang ló é a nghut e za, wamdau hkaû má sheq

✧ **7:10** Htoq Ló 20:12 ✧ **7:10** Htoq Ló 21:17 \* **7:16** Bun zo shí gi, Chyúmlaík ra-am má bo lhê, ra-am má a bò.

wang ló é nghut mù, shinggan shut dum lhoq htoq pyâm é nghut lhê." ga taî ri. (Yhang isu ga taî é gi, zoshuq lhungháng sansêng lhê gá nau é đông nghut ri.)

<sup>20</sup> Hau htoq agó, Yhang xoq taî é gi, "Byù mai htoq ló é haí jung le, byù lé a sanséng nhâng wó dut é nghut lhê. <sup>21</sup> Hkâsu mù gâ lé, ahkaû mai htoq lo é gi, byu pé é myit mai htoq ló é nghut mù, agè ashop é đông myit é hkyô pé, ashop é đông gungsho zùm yap é hkyô, hkaû é hkyô, byù sat é hkyô, sumyi sulàng lú hkyô, <sup>22</sup> myoqnoq é hkyô, agè ashop é hkyô, mhaú zô é hkyô, achayut zùm yap lhâm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; <sup>23</sup> Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri." gâ ri.

*Tûngbàu Myiwe Myhí Rayuq É Lumjîng Myit  
Mht 15:21-28*

<sup>24</sup> Yesuq gi, haú jowò mai htoq ló mù, Turuq eq Sidun maukyo shut e ló luî, yhâm ralhûm má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. <sup>25</sup> Haû mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jâng, Yhâng chyáng jé lé mù, Yhâng é hkyî wang má lé paî gop to luî, <sup>26</sup> yhang zô chyáng mai nat gang lé hkat htoq pyám byi râ matú, Yhang lé dúng tôngbán ri. Myiwe haû gi, Suru-Hpiniki mau mâ é Grik byuhú nghut ri.



<sup>27</sup> Yesuq gi, "Zo wuî† hí zô gyi kó sháng gaq; haî mù gà le, zô wui chyáng mã é zoshuq lé yù mù, hkuî pé‡ lé byi tsô é jung a nghut." ga yhang lé taî kyô ri.

<sup>28</sup> Haú hkûn, yhang gi, "Yhumsîng ê! Haû kúm nghut ri; nghut kôlhang, siboî ô mã é hkuî lháng, zô wui é zô myhit shuq htâng lé, ge zo lhê a nghut lhú?" ga dum tû taî ri.

<sup>29</sup> Haû mù, Yesuq gi, yhang lé, "Nàng tû taî é dang hau é yanmai, ló lo aq hkoi; haû nat gang gi, nung zô chyáng mai htoq ló byuq bê nghut ri." ga taî kat ri.

<sup>30</sup> Myiwe myhí haû gi, yhûm má dum taû jé lo é hkûn, yhang zo chong htoq má leq to láng é lé le, nat gang htoq byuq bê nghut é lé le, lo myang ri.

### *Nojit É Eq Dang A Hkyang É Sû Lé Lhoq Gê Byî É Hkyô*

<sup>31</sup> Yesuq gi, Turuq mau mai dum htoq ló mù, Sidun mai sô lai ló luî, Dekapoli mau hkaû dông lai byit mù, Galile nhông shut gyó jé ló ri. <sup>32</sup> Haú hkûn, byù ra-am gi, nojit é eq dang a hkyang é byù rayuq lé, Yhâng chyáng shuî lé lô kômù, haû yuq é ahtoq má loq ke byi râ matú, Yhang lé dúng tôngbán akô nghut ri.

<sup>33</sup> Yesuq gi, haû yuq lé baú za byù hpúng mai shuî htoq yù mù, yhâng é nohkyûng má loqnyhui htaû háng byi luî, sôkan byé tik yù mù, haû yuq é shô má htau byî ri. <sup>34</sup> Hau htâng, Yhang gi, mauhkûng shut tu wú mù, soq mó shê luî, "Eh-pahta!" (Lichyúm gi, "Bóng aq hkoi!") ga luî, haû

† 7:27 Zo wuî gà é gi, Yudaq byu pé lé gà é nghut lhê. ‡ 7:27 Hkuî pé gà é gi, tûngbau pé lé gà é nghut lhê.

yuq lé taí kat ri. <sup>35</sup> Haú hkûn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

<sup>36</sup> Yesuq gi, haú hkyô ó lé le a taí kyo râ matú, yhangmoq lé hkúm kôhang, yhangmoq gi, je hkúm le, je taí pyo akô nghut ri. <sup>37</sup> Byu pé gi, gyai yhang mauhong byuq bùm kôluí, "Yhang gi, haí lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taí bum akô nghut ri.

## 8

### *Byù Myi Hkyîng Lé Byi Tsô É Hkyô*

#### *Mht 15:32-39*

<sup>1</sup> Haú yoq má, gotû byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, <sup>2</sup> "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyi bò bê, haí le a myàng zo kó nghut ri. <sup>3</sup> Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmut gû yhûm shut nhang kat é nghut le gi, hkyolat má mutyut yut é ló hui kó râ nghut lhê." ga taí ri.

<sup>4</sup> Haú hkûn, Yhâng é chángzô pé gi, Yhang lé, "Îsu é yoso má nhîng, shí myhò bang lé luq shoq byi tso râ zoshuq gi, hkâmá ê yû râ lú?" ga taí akô.

<sup>5</sup> Yesuq gi, "Nungmoq, muk hkâ-myhó long wó akô lú?" ga taú myi jáng, yhangmoq gi, "Nyhit long." ga, dum tû taí akô nghut ri.

<sup>6</sup> Haú mù, Yhang gi, byù hpûng lé myigùng htoq má zùng nhang to luí, muk haú nyhit long lé yù mù,

jeju ban hkya-on jáng, myhik hpé luí, haú bang lé gàm byi râ matú, Yhâng é chángzô pé lé byí kat ri; haú mù, yhangmoq gi, haú bang lé gàm byí akô nghut ri. <sup>7</sup> Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pê é matú jeju hkya-on luí, chángzô pé lé dum gàm byí nhang ri. <sup>8</sup> Yuq hkgámó zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashí kó nghut ri. <sup>9</sup> Zô é bang gi, byù myí hkyíng kô nghut ri; Yesuq gi, haú bang lé, nhang kat luí, <sup>10</sup> Yhâng é chángzô pé eq rahá, lhaí má wang ji mù, Dalamanuhta mau má ê jé akô nghut ri.

<sup>11</sup> Hparishe pé gi, lé mù, Yesuq eq dang htíng htíng lhùm akô; hau htoq agó, yhangmoq gi, mauhkúng mâ é kumlhá lé dúng é dông, Yhang lé chyam wú akô nghut ri. <sup>12</sup> Yesuq gi, myít nò-kyíng kying luí, yhangmoq lé taí é gi, "Haí mù luí, shí ipyat lhé é byu pé gi, limik kumlhá dúng akô lhú? Ngò teng za taí kôlé, shí ipyat mâ é bang lé, hai kumlhá le tûn shit râ a nghut." gâ ri. <sup>13</sup> Hau htâng, Yhang gi, yhangmoq lé pyâm to mù, lhaí má dum taú wang ló luí, tû tap shut gû dap e ló bê nghut ri.

### *Hparishe Pé Eq Herut É Múnchi*

#### *Mht 16:5-12*

<sup>14</sup> Haú chángzô pé gi, muk yu chûng râ lé tô-myhí pyám kôluí, lhaí hkaú má muk ralong za ru wó akô nghut ri. <sup>15</sup> Yesuq gi, yhangmoq lé, "Nungmoq gi, Hparishe pé eq Herut é múnchi\* lé, sidíq luí, koi pyâm nyí keq." ga taí ri.

\* **8:15** Shí má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhé.

16 Haú hkûn, yhangmoq gi, "Nga-nhûng chyáng muk a bo é yanmai, haú su ga taí é nghut ri." ga luí, rayuq eq rayuq taí lhûm bum akô nghut ri.

17 Haú su ga taí lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhûm nyi akô lhú? Ahkuí jé shoq, nungmoq gi, a byu-myàng, a sê gyo shi kó lhú? Nungmoq é myit nhiklhum gi, ru htan nyi ashí kó lhú? 18 Myoq dap to kôluí nhîng, a myàng kó lhú? Nohkyap dap to kôluí nhîng, a wó gyo kó lhú? 19 Ngò, muk ngo long lé myhik hpé mù, byù ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsîng yu é lé, bun ashí kó lhú?" ga myi jáng, yhangmoq gi, "Raxe í mung." ga tû taí akô.

20 Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsîng yù kô é lhú?" ga myi jáng, yhangmoq gi, "Nyhit mung." ga dum tû taí akô.

21 Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myí ri.

### *Myoqjit Sû Rayuq Lé Lhoq Gê Byí É Hkyô*

22 Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú, dúng tóngbán akô. 23 Yesuq gi, myoqjit sû haú yuq é loq lé zui mù, wà shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myí kat ri.

<sup>24</sup> Haû jáng, yhang gi, tu wú kat luî, "Byu pé gi, sikgâm su dut luî, hkyô sô wún é lé, ngò myang ri." ga taî ri.

<sup>25</sup> Hau htâng, Yesuq gi, haú yuq é myoq má Yhâng é loq dum ke byî ri; haú hkûn, haú yuq é myoq gi, bống lô mù, ge byuq luî, haî lé le san za myàng bê nghut ri. <sup>26</sup> Yesuq gi, haú yuq lé, "Wà hkaû má hkâwang ló lo." ga taî luî, yhâng é yhûm shut ló nhang kat bê nghut ri.

*Hkrisduq Ga, Petruq Yín Yu É Hkyô*

*Mht 16:13-20; Luk 9:18-21*

<sup>27</sup> Yesuq eq Yhâng é chángzô pé gi, Kesare-Hpilipi wà mó awuî ayàm mâ é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taî akô lhú?" ga myî ri.

<sup>28</sup> Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taî akô." ga, Yhang lé tû taî akô.

<sup>29</sup> Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tû taî ri.

<sup>30</sup> Yesuq gi, haú hkyô ó lé le a taî kyo râ matú, yhangmoq lé taî hkúm ri.

*Byu Yhangzo Gi, Sat Pyâm É Hui Luî, Dum Dui Toq Râ Hkyô*

*Mht 16:21-28; Luk 9:22-27*

---

† **8:29** Grik dong Hkrisduq gâ é gi, xû but hui Sû gâ é lichyúm nghut mù, Hebre dong "Mesaia" gâ é eq rajung za nghut lhê.

<sup>31</sup> Hau htâng, Yhang gi, yhangmoq lé mhoqshit é má, "Haû Byu Yhangzo gi, zing-rî é myo myo hui zo luí, suwún wuî, hkyangjong agyi pé, tarâ sará pé èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyì má, dum dui toq râ nghut lhê." gâ ri. <sup>32</sup> Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yû mù, Yhang lé tân ri.

<sup>33</sup> Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

<sup>34</sup> Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naû sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chùng luí, cháng ra râ nghut lhê. <sup>35</sup> Hkâsu mù gâ le, yhumsing é asak lé hkyi yù naû sù ó yuq nghut kôle, asak sum râ nghut lhê; nghut kôlhang, Ngá é yanmai le, haû gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. <sup>36</sup> Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyû bò râ lúh? <sup>37</sup> Byù gi, yhumsing é asak woi-nyí lé, hai èq wó htaí yù râ lúh? <sup>38</sup> Yubak mara myô é eq sumyi sulàng shut é ipyat shí má, Ngò eq Ngá é đang lé hoq pyâm é sù ó yuq lé le, haû Byu Yhangzo gi, Yhâng Wâ é hpungwup shingkang bo é èq, haû chyoiyúng maumang lagyô pé eq rahá jé lé é hkûn,

hoq pyám râ nghut lhê."☆ gâ ri.

## 9

<sup>1</sup> Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó rá a nghut." ga taí ri.

*Yesuq É Ihpyô Isâm Htaí Lo É Hkyô  
Mht 17:1-13; Luk 9:28-36*

<sup>2</sup> Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhum má doq ló akô; haú hkûn, yhangmoq é myoq hí tê má, Yesuq é ihpyô isâm htaí lo ri. <sup>3</sup> Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyû shoq a wó xaú hpyu wú é nghut lhê. <sup>4</sup> Eliyaq eq Mosheq gi, yhangmoq é hí má htoq shit mù, Yesuq eq dâng nyo lhûm nyi akô.

<sup>5</sup> Haú mù, Petruq gi, Yesuq lé, "Rabai ê, shí jowò má nga-nhúng nyi le ge ri; haú mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí ri. <sup>6</sup> Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haú su gâ é nghut ri.

<sup>7</sup> Hau htâng, mhut htoq lô luí, yhangmoq lé htup zíng lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

☆ **8:38** Yer 3:8; Ezk 23:37; Hos 2:2-10

<sup>8</sup> Haú hkûn jáng, chángzô pé gi, lhínghkyuq má wú kat le, Yesuq za yhangmoq eq rahá nghut nyi é mai lai lui, ó lé le, a myàng lo kó nghut ri.

<sup>9</sup> Yhangmoq, bùm mai taù gyó lô kô é hkûn, Yesuq gi, haù Byu Yhangzo shi é mai a dum dui toq toq gi, yhangmoq myang é hkyô lé, ó lé le a taì kyo râ matú taì hkûm tô ri. <sup>10</sup> Chángzô pé gi, dang haú lé myit má kat to kôluì, "Shi é mai dum dui toq râ." gâ é lichyúm lé, rayuq eq rayuq myì lhùm bum akô nghut ri.

<sup>11</sup> Hau htâng, yhangmoq gi, "Eliyaq hí lé ra râ nghut lhê ga, tarâ sará pé haì mù taì kô é l hú?" ga, Yesuq lé myì akô.

<sup>12</sup> Haú hkûn, Yesuq gi, "Eliyaq hí jé lé é gi, teng bê nghut lui, lhungháng lé dum lajâng tô é nghut ri. Nghut kôlhang, haù Byu Yhangzo gi, myo myo hpuzo lui, he-ngik pyâm é hui ra nghut lhê ga le, Chyúmdang má kê to ashì, a nghut kó l hú? <sup>13</sup> Ngò, nungmoq lé taì kôlé, Eliyaq gi, jé lé bê nghut mù, yhang eq séng lui Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tù taì ri.

### *Nat Dap É Yuqgè Zo Rayuq Lé Lhoq Gê Byì É Hkyô*

*Mht 17:14-20, 22-23; Luk 9:37-45*

<sup>14</sup> Yhangmoq gi, chángzô pé chyáng dum taù jé lô kô é hkûn, haú bâng é lhínghkyuq má byù moq mó zîng lé é lé le, tarâ sará pé, haù bang eq dang htîng htîng lhùm nyi kô é lé le, myang akô. <sup>15</sup> Haú má nyi tô é lhunghâng bang gi, Yesuq lé myang kat é eq, maù byuq kôluì, din ê mù, ê shi-kyâm akô nghut ri.



16 Haú hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htíng lhûm nyi akó lhú?" ga myí ri.

17 Byù hpúng hkaû mâ é rayuq tû taí kat é gi, "Sarâ ê! Nhut jít nhang é nat wang júng tô é ngâ é yuqzo lé, Náng chyáng shuí lé lo lhê. 18 Nat haú gi, yhâng chyáng wàng hkangmó, yhang lé myi htoq má lhoq leqbat nhang ri; haú mù, yhang gi, nhut mai guttsû htoq lhê, zuì kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

19 Haú hkûn, Yesuq gi, "Lumjínng myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga taí kat ri.

20 Haú mù, yhangmoq gi, yuqgè zo haú lé shuí lé lo akó; nat haú gi, Yesuq lé myang kat é eq yhang, yuqgè zo haú lé langhtân nhang ri; yuqgè zo haú gi, myigùng má lêng leq luí goleng leng mù, nhut mai tsû-myup htoq nyi ri.

21 Haú hkûn, Yesuq gi, yhângwa lé, "Yhang, isu dut é hkâ-myháng myáng bê lhú?" ga myi jáng, yhâng wa gi, "Zoshâng hkûn mai nghut bê. 22 Nat haú gi, yhang lé lhoq sat pyám naú mù, myi má le, wui má le, anum num lêng wàng nhang wú bê nghut lhê; nghut kôlhang, Nàng, rajung jung wó kut byí é nghut le gi, ngá hpe lé shogyo yù laq, garúm yù laq." ga tû taí ri.

23 Yesuq gi, "Nàng, wó kut byí é nghut le gi, ngû, haí mù taí lhê lhú? Lumjínng myit bò su é matú gi, haí le wó dut lhê." ga, yhang lé taí ri.

24 Haû zôshang é yhângwa gi, radá dâm, "Ngò lumjínghê; nghut kôlhang, ngá é lumjínghê myit gi, shaû ashî nghut é yanmai garúm yû laq." ga taí garú ri.

25 Yesuq gi, byù hpúng din zínghê lô kô é lé, myàng jáng, haû agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhâng chyáng mai htoq ló aq; hkâ-nhám le, yhâng chyáng hkádum wàng lo." ga tân kat ri.

26 Haú hkún, nat haû gi, garu mù, zoshâng haû lé wum kat langhtân nhâng luí, htoq ló byuq bê. Zoshâng haû gi, shî mâng gùng su dut byuq é yanmai, byù myo myo gi, "Yhang shî bê nghut ri." ga taí akô. 27 Nghut kôlhang, Yesuq gi, zôshang é loq má zui luí, tu toq kat ri; haû mù, zoshâng gi, yap to bê nghut ri.

28 Yesuq, yhúmhaû má wang ló é htâng, Yhâng é chángzô pé gi, "Ngamoq gi, haî mù, nat haû lé a wó hkat htoq é lhú?" ga, tsik za Yhang lé myî akô.

29 Yesuq gi, "Haú jung nat lé gi, kyûdûng é dông za a nghut jáng, wó hkat htoq râ a nghut." ga, yhangmoq lé tû taí ri.

30 Yhangmoq gi, haú jowò mai htoq ló mù, Galile mau mai lai ló akô; nghut kôlhang, Yesuq gi, ó lé le a sé nhâng naù nghut ri. 31 Haî mù gâ le, Yhang gi, "Haû Byu Yhangzo gi, byu pê é loq má ap pyâm é hui râ nghut lhê; haú bang gi, Yhang lé sat pyâm kó râ nghut lhê; nghut kôlhang, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhòqshit byî nyi é yanmai nghut ri. 32 Yhâng é chángzô pé gi, dang

haú lé a sê gyo kôlhang, Yhâng chyáng a wám myi kó nghut ri.

*Kô Dik Sû Gi, Ó Yuq Nghut Lhê Lhú?*

*Mht 18:1-5; Luk 9:46-48*

<sup>33</sup> Yhangmoq gi, Kaperna-um wà má jé e akô nghut ri. Yesuq gi, yhúmhkaû má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lhú?" ga myî ri.

<sup>34</sup> Nghut kôlhang, yhangmoq gi, zim za nyi tô akô; hkâsu mù gâ le, ko dik sû gi, ó yuq nghut lhê nghû é hkyô lé, hkyolat má, yhangmoq dang chyin chyin lhum kô é yanmai nghut ri.

<sup>35</sup> Yesuq gi, zùng mù, haû chángzo raxe í yuq lé, wut yù luî, "Kô dik naû sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga tâi ri.

<sup>36</sup> Hau htâng, Yhang gi, zoshâng rayuq lé shuí yù mù, yhangmoq é gung gung má shap to luî, dum bún yù mù, yhangmoq lé tâi é gi, <sup>37</sup> "Shî sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

*Nga-nhúng Lé Gye A Kut É Sû Gi, Nga-nhúng É Hkyam Shut Nghut Lhê Gâ É Hkyô*

*Luk 9:49-50*

<sup>38</sup> Haú hkûn, Yohan gi, "Sarâ ê! Náng é myìng lang luî, nat gâng pé lé hkat pyám byî wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkûm pyâm é nghut lhê." ga tâi ri.

<sup>39</sup> Yesuq kúm gi, "Yhang lé hkâhkúm kó; Ngá myîng lé lang luî, laklaí kumlhá kut é sù gi, razup za má, Ngò eq séng luî, a ge é hkyô pé lé taí rà a nghut; <sup>40</sup> Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê. <sup>41</sup> Ngò, nungmoq lé teng za taí kôlé, nungmoq gi, Hkrisduq eq séng é bang nghut lhê gâ é yanmai, ngá é myîng lé lang luî, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù rà za nghut lhê.

*Mara Shut Nhang É Hkyô*

*Mht 18:6-9; Luk 17:1-2*

<sup>42</sup> Ngo lé lumjîng é zoshâng wuî mâ é rayuq lé, mara kut shut nhang é sù gi, yhâng é lingzing má luqluí long mó tuî hut byi luî, wuimau má è dú hkyó pyâm é huî é nghut lé gi, yhang é matú je gè rà nghut lhê. <sup>43</sup> Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luî, hkâ-nhám le, myiduq a dat shum é ngaraî ming wàng rà htoq má, loq raloq eq za ahtum abyuq é asak wó rà shut wàng le gi, náng é matú je ge ri. <sup>44</sup> (Haú ngaraî ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)\* <sup>45</sup> Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyî í hkyî dap luî, hkâ-nhám le, myiduq a dat shum é ngaraî ming má dú hkyô pyâm é hui rà htoq má, hkyî rahkyî za dap luî, ahtum abyuq é asak wó rà shut wang le gi, náng é matú je ge ri. <sup>46</sup> (Haú ngaraî ming gi, 'yhangmoq lé hkê nyi é

\* **9:44** Bun zo 44, 46, gi, Chyúmlaika myo myo má a bo é nghut lhê.

luq le a shî, myiduuq le a shûm' é jowò nghut lhê.)

<sup>47</sup> Náng é myoqjí eq, nang lé mara kut shut nhang é nghut le gi, haû lé lap choq pyám aq; myoqjí í jí dap gû, ngaraî ming má dú hkyó pyâm é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

<sup>48</sup> (Haû ngaraî ming gi, 'yhangmoq lé hkê nyi é luq le a shî, myiduuq lé a shûm' é jowò nghut lhê.)✧

<sup>49</sup> Hkâsu mù gâ le, hkungga sho lé xo kat luî lhoq sansêng é su, myi gi, yuq hkanqmó lé lhoq sanséng râ nghut lhê.✧

<sup>50</sup> Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yù râ lúhú? Nungmoq gi, xo su ngam nyi mù, rayuq eq rayuq nguóngón nyí keq." ga taî ri.

## 10

### *Myi, Làng Gâng É Hkyô*

### *Mht 19:1-12; Luk 16:18*

<sup>1</sup> Hau htâng má, Yesuq gi, Kaperna-um mai htoq ló mù, Yuda mau mâ é maukyo má ê jé luî, Yodan làng tû tap má dap ló bê nghut ri; byù myo myo gi, Yhâng chyáng dum zîng lé lô kôluî, Yesuq gi, Yhang lhaq kut nyi é eq rajung za, haû bang lé mhoqshit byî ri.

<sup>2</sup> Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lúhú?" ga myî é dong, Yhang lé chyam wú akô.

✧ 9:48 Esai 66:24 ✧ 9:49 Nhong 2:13

<sup>3</sup> Yesuq gi, "Mosheq gi, nungmoq lé, hkâsu ga hkunmó hkyó tô é lhú?" ga taú myî ri.

<sup>4</sup> Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byî tô ri." ga tû taî akô.

<sup>5</sup> Yesuq dum tû taî é gi, "Nungmoq é myit nhikhum htân kô é yanmai, Mosheq gi, tarâ haú lé kê tô é nghut lhê. <sup>6</sup> Nghut kôlhang, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.<sup>☆</sup> <sup>7</sup> 'Hau é yanmai, yuqgè gi, yhumsing ínu íwâ chyáng mai htoq luí, yhangmyi eq rahá rading ralhum za kut nyî mù, <sup>8</sup> yhangnhik gi, gungsho ralhum za dut byuq kó râ nghut lhê'.<sup>☆</sup> Haú mù luí, yhangnhik gi, í yuq a nghut lo é za, rayuq za dut bê nghut ri. <sup>9</sup> Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

<sup>10</sup> Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myî akô. <sup>11</sup> Haú hkûn, Yhang gi, "Yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê.

<sup>12</sup> Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tû taî ri.

### *Zoshâng Wuì Eq Yesuq É Hkyô*

#### *Mht 19:13-15; Luk 18:15-17*

<sup>13</sup> Byu pé gi, zoshâng wuì lé Yesuq záng byi sháng gaq ga, Yesuq chyáng shuí lé lo akô; nghut kôlhang,

chángzô pé gi, yhangmoq lé lhom tân hkûm akô nghut ri. <sup>14</sup> Haû lé Yesuq myàng jáng, Yhang gi, wú nhik-yo naû luí, "Haû zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haû su é bâng é mingdán ru nghut lê. <sup>15</sup> Ngò, nungmoq lé teng za tai kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haû má wó wâng râ a nghut." ga yhangmoq lé tai ri. <sup>16</sup> Hau htâng, Yesuq gi, zoshâng wuì lé bún yû mù, yhangmoq ahtoq má loq ke luí, shimân byî ri.

*Sùt Wó É Zorâm Rayuq É Hkyô*

*Mht 19:16-30; Luk 18:18-30*

<sup>17</sup> Yesuq gi, hkyô dum so xoq e ló é hkûn, byù rayuq gi, òn lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yû rá matú, ngò haî kut ra rá lú?" ga myî ri.

<sup>18</sup> Haû mù, Yesuq gi, "Haî mù, Ngo lé ge é Sará nghu lê lú? Garai Gasang mai lai luí, ge é ó yuq le a nyì. <sup>19</sup> Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!\*" ga bo tô é lé, nàng sê lê." ga tû tai ri.

<sup>20</sup> Haû hkûn, haû yuq gi, "Sará ê, haû pé banshoq lé, ngò, zoshâng hkûn mai cháng bê nghut lê." ga tai ri.

<sup>21</sup> Yesuq gi, haû yuq lé wú tsuq to mù, yhang lé chyitdap luí, tai é gi, "Nàng kut rá rajung râ tô ashî; ló mù, nàng wó miwó lé ùng pyám luí, myùng bang lé byî pyám aq; haû jáng, nàng, mauhkûng htoq má

\* **10:19** Htoq Ló 20:12-16

sutzè wó râ nghut lhê; haû mù, Ngá htâng lé cháng aq." gâ ri.

<sup>22</sup> Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq ló byuq bê nghut ri.

<sup>23</sup> Yesuq gi, lhîngkhyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haû-í yhang wuî ri-nhung!" ga taî ri.

<sup>24</sup> Chángzô pé gi, Yhang taî é dâng é yanmai, mauhong bum akô nghut ri. Nghut kôlhang, Yesuq dum xoq taî é gi, "Zo wuî ê, Garai Gasâng é mingdán má wàng râ matú, haû-í yhang wuî ri-nhung! <sup>25</sup> Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." gâ taî ri.

<sup>26</sup> Haú hkûn, chángzô pé gi, je riyhang maú byuq kô mù, rayuq eq rayuq, "Haû su ru nghut le gi, ó yuq za hkyi yu é hui râ nghut lhê lú?" ga, taî lhûm bum akô nghut ri.

<sup>27</sup> Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taî ri.

<sup>28</sup> Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to lui, Náng htâng cháng bê nghut lhê." ga taî ri.

<sup>29</sup> Haû mù, Yesuq tû taî é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuî eq yò pé lé tô pyâm tô é sù ó yuq



nghut kôle, <sup>30</sup> shí pyat lhê é yhûm pé, gumang gu-nhá wuî, înu pé, zo dù wuî eq yò pé lé, rashô tú wó hkam yù luî, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yû râ nghut lhê. <sup>31</sup> Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

*Yesuq, Yhang Shî Râ Hkyô Lé Dum Taî É Hkyô  
Mht 20:17-19; Luk 18:31-34*

<sup>32</sup> Yhangmoq gi, Yerusalem wà mó shut doq ló nyî kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taî kyô é gi, <sup>33</sup> "Wú keq, nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byî pyâm é hui râ nghut lhê; haú bang gi, Yhang lé, shî râ mara byi luî, tûngbaù pê é loq má ap byî pyám kó râ nghut lhê. <sup>34</sup> Haú bang gi, Yhang lé, wuîzùi kut pyâm é, sôkan byé gyûn é, nhuq bat é kut yû mù, sat pyám kó râ nghut lhê. Hau htâng sum nyî má, Yhang dum dui toq lô râ nghut lhê." gâ ri.

*Yakuq eq Yohan nhik dung é hkyô  
Mht 20:20-28*

<sup>35</sup> Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nàng kut byi râ lé, ngá-nhik ô nau ri." ga taî akô.

<sup>36</sup> Haú hkûn, Yhang gi, "Ngò, nungnhik lé haî kut byi râ ô naú akò lhú?" ga myî ri.

<sup>37</sup> Yhangnhik gi, "Náng é hpungwup shing kang hkaú má, ngá-nhik tâng lé, Náng é loqyò hkyam má rayuq, loqpaî hkyam má rayuq kut, zùng nhâng laq." ga tû taî akò.

<sup>38</sup> Nghut kôlhang, Yesuq gi, "Nungnhik haî dúng nyi é lé, nungnhik a sé kó nghut ri. Ngò shuq râ góm\* lé, nungnhik wó shuq kó râ lhú? Ngò hkam yù râ baptisma lé, nungnhik wó hkam yù kó râ lhú?" ga yhangnhik lé tû taî ri.

<sup>39</sup> Haú hkûn, yhangnhik gi, "Nga-nhik wó dut lhê." ga tû taî kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê.

<sup>40</sup> Nghut kôlhang, Ngá é loqyò, loqpaî hkyam má zùng râ ahkáng lé gi, Ngò byî jung a nghut. Jowò haú pé gi, hen to byî é hui bâng matú za nghut lhê." ga yhangnhik lé taî ri.

<sup>41</sup> Haú su gâ é hkyô lé, haú gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akò nghut ri. <sup>42</sup> Yesuq gi, yhangmoq banshoq bang lé wut tsîng yù luî, "Tûngbaù pé lé uphkang é ga bang gi, tûngbaù pé lé up zô nyi kô é hkyô lé le, haú eq rajung za, yhangmoq é ming up suwún wuî le, yhumsing é ahkáng ayá lé chûng mù, up zô nyi kô é hkyô lé le, nungmoq sê lhê.

<sup>43</sup> Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut naú sù ó yuq nghut kôle, nungmoq é dui-nhâng zoshâng

---

\* **10:38** Góm eq baptisma gâ é gi, jamjau hui râ eq shî râ lé, taî nau é nghut lhê.

dut ra râ nghut lhê. <sup>44</sup> Hau htoq agó, nungmoq má ushuq dut naù sù ó yuq nghut kôle, banshoq bâng é jùn dut ra râ nghut lhê. <sup>45</sup> Hkâsu mù gâ le, haù Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé taí ri.

*Myoqjit Sù Barateme, Myoq Dum Myang É Hkyô  
Mht 20:29-34; Luk 18:35-43*

<sup>46</sup> Hau htâng, yhangmoq gi, Yerihko wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyî kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. <sup>47</sup> Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

<sup>48</sup> Haù mù, byù myo myo gi, zim za nyî râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

<sup>49</sup> Haù mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, nang lé ji nyi ri; toq aq." ga myoqjit sù haù lé taí akô. <sup>50</sup> Haù hkûn, haù yuq gi, yhâng é buhîng lé hkyut pyám mù, byam chyu luí, Yesuq chyáng lé jé ri.

<sup>51</sup> Yesuq gi, yhang lé, "Ngò, nang lé haí kut byi râ ô nau ri lhú?" ga myi jáng, yhang gi, "Sarâ ê, ngò myoq myàng nau ri." ga tú taí ri.

<sup>52</sup> Yesuq gi, "Ló aq hkoi, náng é lumjínq myit gi, náng lé lhoq gê byi bê nghut ri." ga taí kat é hkún jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

## 11

*Yesuq, Yerusalem Wà Mó Má Wang Ló É Hkyô  
Mht 21:1-11; Luk 19:28-40; Yhn 12:12-19*

<sup>1</sup> Yesuq eq Yhâng é chángzô pé gi, Yerusalem wà mó eq chyâng lo nyi kô é hkún, Tsanlun Bùm mâ é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé, <sup>2</sup> "Nungnhik, hí mâ é wà má é keq; wà háu má wang é hkún jáng, ó le a jî wú shî é logúng zo tuí to lánq é lé, é myâng kó râ nghut lhê; háu lé hpyi yù mù, Ngá chyáng she lò keq. <sup>3</sup> Byù rayuq yuq mai, 'Haí mù, háu su kut nyi akô lhú?' ga nungnhik lé lhom myi jáng, 'Shí du lé, háu Yhumsîng râ ri ga, razup má dum taû dé byi râ nghut lhê.' nghú tù taí keq." ga pyíng luí, nhang kat ri.

<sup>4</sup> Háu nhik gi, e ló mù, hkyô mó yâm mâ é hkumdong nàm má tuí tô é logúng zo radu lé, é myâng kôluí, háu lé tuí hpyi nyi akô. <sup>5</sup> Háu hkún, háu má yap tô é bang ra-am gi, "Haí mù, logúng tuí hpyi nyi akô lhú?" ga myí akô. <sup>6</sup> Háu jáng, yhangnhik gi, Yesuq pyíng kat é eq rajung za taí kyo kôjáng, yhangmoq gi, she ló râ ahkáng byí kat akô nghut ri. <sup>7</sup> Yhangnhik, logúng zo háu lé Yesuq chyáng she jé lo é hkún, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jî ri. <sup>8</sup> Byù myo myo gi, yhangmoq

é buhîng pé lé, hkyô má hkyut hkang byî akô; ram gi, yò pé má zân yu é mhandíng lé hkang byî akô nghut ri. <sup>9</sup> Hí má so bang eq htâng má châng é bang gi,

"Hosana!"\*

Haû Yhumsîng é myîng mai jé lé lô Sû gi, hkungsô wó nyî sháng gaq ô!

<sup>10</sup> Jé lé lô râ nghut é, nga-nhûng é îwa Dawiq é mingdán gi, hkungsô wó nyî sháng gaq ô!

Htoq tsáng myhâng má hosana nghut sháng gaq ô!"<sup>☆</sup>

ga luî, tai garû bum akô nghut ri.

<sup>11</sup> Yesuq gi, Yerusalem wà mó má jé mù, no-qquq yhûm má wang ê luî, lînghkyuq mâ é jung hkangmó lé wú ri; nghut kôlhang, bui gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

*Maihpáng Gâm Ashi A Zui Râ Matú Tai É Hkyô  
Mht 21:18-19*

<sup>12</sup> Hau htang nyî, yhangmoq, Behtani wà mai htoq ló kô é hkûn, Yesuq gi, zo mut bê nghut ri.

<sup>13</sup> Yhang gi, ahaq wúm é maihpáng gâm ragàm lé, we we mai byu-myang kat jáng, agàm haû má ashi zuî lhê laq ga ê jé wú le, ahaq mai lai luî, haî le a myàng nghut ri. Haî mù gâ le, maihpáng-shi zui yâm a nghut é yanmai nghut ri. <sup>14</sup> Haû mù, Yesuq gi, shigâm haû lé, "Ahkuî mai gi, náng chyáng mâ é ashi, ó yuq le a myàng zo lo kó sháng gaq." ga tai ri.

\* **11:9** Hebre dang má, hosana gâ é gi, "ahkuî hkyi yù laq" gâ é nghut lhê. Nghut kôlhang, bun zo 9, 10 má gi, hkya-on dang dông chung é nghut lhê. <sup>☆</sup> **11:10** Hkya-on 118:25-26

Yhâng é chángzô pé gi, haû su ga taî é dang lé wó gyô yu akô nghut ri.

*Yesuq, Noqkuq Yhûm Lé Lhoq Sansêng Pyâm É Hkyô*

*Mht 21:12-17; Luk 19:45-48; Yhn 2:13-22*

<sup>15</sup> Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haû má é zè ung zè wuî kut nyi é bang lé, hkat htoq pyám luî, ngùn htaî zo bâng é siboî pé eq hpûngkyui ung zo bâng é tanghkuq pé lé tu mhuq pyám byî ri. <sup>16</sup> Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyâm ri.

<sup>17</sup> Yesuq, yhangmoq lé mhoqshit é gi,

""Ngá yhûm gi, byû myû lhunglhâng bâng é matú, kyûdung yhûm ga râ nghut lhê."\*

ga kâ tô é a nghut kó lú? Nghut kôlhâng, nungmoq gi, 'damaq hkyûng' kut pyám bekô nghut ri." gâ ri.\*

<sup>18</sup> Hkyangjong agyi pé eq tarâ sará pé gi, haû lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhâng, shiwa byu pé gi, Yhang mhoqshit é hkyô má, myit zìng zuq bum kô é yanmai, yhangmoq gi, Yhang lé gyuq bum akô nghut ri.

<sup>19</sup> Myinhâng jé jáng, Yesuq eq Yhâng é chángzô pé gi, wà hkaû mai htoq ló bekô nghut ri.

*Maihpáng Gâm Nyhuî Shi Byuq É Hkyô*

*Mht 21:20-22*

<sup>20</sup> Htang napkyó, yhangmoq sô laî ló le, maihpáng gâm gi, amyit mai yhang nyhuî kyuq

\* 11:17 Esai 56:7 \* 11:17 Yer 7:11

shi byuq é lé myang akô. <sup>21</sup> Petruq gi, myit bûn kat luî, "Rabai ê, wú aq! Nàng nhîng pyâm é maihpáng gâm gi, nyhuî shi byuq bê nghut ri." ga luî, Yesuq lé taî ri.

<sup>22</sup> Haú hkûn, Yesuq gi, "Garai Gasang lé lumjîng keq. <sup>23</sup> Ngò, nungmoq lé teng za taî kôlé, ó yuq nghut kôle, i-myit má úng-âng é hkyô a bo é za, yhumsîng taî é hkyô gi, dut lò râ nghut lhê ga lumjîng kô é nghut le gi, bùm shî lé, 'Htot mù, wuimau má ló gyó wâng aq.' ga taî le lháng, haú hkyô dut byi râ nghut lhê. <sup>24</sup> Haú mù luî, Ngò, nungmoq lé taî kôlé, nungmoq haî dîng le le wó yû râ nghut lhê nghû lumjîng kô é nghut le gi, wó yû kó râ za nghut lhê. <sup>25</sup> Mauhkûng htoq mâ é nungmoq é Îwa gi, nungmoq é mara lé hkyut pyâm byi sháng gaq, nungmoq gi, kyûdîng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyâm byi keq; <sup>26</sup> (Nghut kôlhang, nungmoq mai mara a hkyut pyâm byî é nghut le gi, mauhkûng htoq mâ é nungmoq é Îwa le, nungmoq é mara lé hkyut pyâm byi râ a nghut.)" ga tû taî ri. †

*Yesuq É Ahko Ahkáng Lé Myî Chyam É Hkyô*

*Mht 21:23-27; Luk 20:1-8*

<sup>27</sup> Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wuî gi, Yhâng chyáng lé jé kômù, <sup>28</sup> "Hai ahko ahkâng eq, Nàng, shí pé lé kut nyi lhê lhú? Haú su kut râ ahko ahkáng, Nang lé ó yuq byî é lhú?" ga myî akô.

† **11:26** Bun zo shî gi, Chyúmlaiká ra-am má za bo lhê.

<sup>29</sup> Haú jáng, Yesuq gi, "Ngò le, nungmoq lé rajung myî wú kôlê, tû taí wú keq; haú hkûn, hai ahko ahkâng èq, Ngò, shí pé kut é hkyô lé taí kyo râ nghut lhê. <sup>30</sup> Yohan byî é bapisma gi, mauhkûng mai lhú? A nghut jáng, byu chyáng mai lhú? Taí wú keq!" ga taú myî kat ri.

<sup>31</sup> Haú hkûn, yhangmoq chôm hpyê lhum kô é gi, "'Mauhkûng mai nghut lhê' nghû nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga râ nghut; <sup>32</sup> 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng bang lumjîng bûm kô é yanmai, yhangmoq gi, haú byu pé lé gyuq bum akô nghut ri.)

<sup>33</sup> Haú mù, yhangmoq gi, Yesuq lé, "Ngamoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

## 12

### *Tsibiyiq Hkyâm Saí Bang Lé Dangtú Yu É Hkyô Mht 21:33-46; Luk 20:9-19*

<sup>1</sup> Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lhîngkhyuq kyâm to luí, tsibiyiq wing pyik htoq râ donghkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri. <sup>2</sup> Kyôshu yoq jé jáng, yhang gi, yhang yù âng é tsibiyiq shi é yû râ matú, dui-nhâng zoshâng rayuq lé, hkyâm saí zo bâng chyáng



nhang kat ri. <sup>3</sup> Nghut kôlhang, haú bang gi, haú yuq lé lhom chyup bat luí, loq kôm taú nhang kat akô. <sup>4</sup> Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. <sup>5</sup> Hau htâng, rayuq lé dum nhang kat jáng, haú yuq lé gi, lhom sat pyám akô; Yhang gi, góbang myo myo lé le, yhangmoq chyáng nhang kat ashí nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

<sup>6</sup> Ló htáng má, yhang gi, yhang chyitdap é zo lé nhang kat râ za ru nghut alô; haú mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

<sup>7</sup> Nghut kôlhang, haú bang gi, 'Shí yuq gi, silí wunlí sing yù râ sù nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yù râ nghut lhê.' ga rayuq eq rayuq taí lhûm bum akô. <sup>8</sup> Haú mù, yhang lé chyup yú luí, sat pyám mù, hkyâm shinggan shut dú htoq pyám akô nghut ri.

<sup>9</sup> Haú jáng, tsibiyiq hkyâm yhumsîng gi, yhangmoq lé hkâsu kut râ l hú? Yhang gi, ê mù, haú hkyâm saí zo bang lé sat pyám luí, hkyâm haú lé, góbang lé htot ngho byí pyám râ nghut lhê.

<sup>10</sup> Chyúmdang má,

'Yhûm saí bâng èq hkyin htoq pyám é luqgok gi, htungchyûn mâ é ahkyak dik é luqgok dut bê.

<sup>11</sup> Shí hkyô gi, haú Yhumsîng kut é nghut luí, nga-nhûng é myoq hí má mauho dut bê nghut

ri.' ga bò tô é lé, nungmoq a nghap wú kó  
 lhú?"<sup>☆</sup>  
 gâ ri.

<sup>12</sup> Hau htâng, yhangmoq gi, dangtú haû, yhang-  
 moq lé lhoq ang luî tai é hkyô lé, sé kô é yanmai,  
 Yhang lé chyup yû râ matú hkyô ho nyi akô. Nghut  
 kôlhang, yhangmoq gi, byù moq mó lé gyuq kô é  
 yanmai, Yhang lé nyhi pyâm to luî, htoq ló byuq  
 bekô nghut ri.

*Kehtaq\* Lé Kang Kat Byî É Hkyô*  
*Mht 22:15-22; Luk 20:20-26*

<sup>13</sup> Hau htâng má, yhangmoq gi, Yesuq é dang má  
 mara hô luî Yhang lé chyup yû râ matú, Hparishe  
 pé ra-am eq Herut é byu pé ra-am lé, Yesuq chyáng  
 nhang kat akô. <sup>14</sup> Haú bang gi, Yhâng chyáng lé  
 jé kômù, "Sará ê, Nàng gi, tengmán sù nghut é lé,  
 ngamoq sê lhê. Nàng gi, ó haî ga râ lé le haî su a  
 ngàm sù nghut é yanmai, ó yuq é myoqdong lé le a  
 tê byî é za, Garai Gasâng é hkyô lé, tengmán é dông  
 mhoqshit é sù nghut ri. Haû mù, Kehtaq lé kang  
 kat byî le gi, ge lhê lhú? <sup>15</sup> Ngamoq kat ra râ lhú? A  
 kat ra râ lhú?" ga Yhang lé tai akô.

Yesuq kúm gi, yhangmoq, gegùn labyoq kut nyî  
 kô é lé sé mù, "Nungmoq gi, haî mù, Ngo lé lé  
 chyam wú akô lhú? Denari ngùn rachap yu lé  
 keq, ngò wú wú bá." ga tai kat ri. <sup>16</sup> Haú hkûn,  
 yhangmoq yu jé lô jáng, Yhang gi, "Shí má, ó yuq  
 é alhô eq masat laiká dap tô ri lhú?" ga myî ri.

Yhangmoq gi, "Kehtaq é nghut ri." ga tû tai akô.

<sup>☆</sup> **12:11** Hkya-on 118:22-23

<sup>\*</sup> **12:12** Kehtaq gâ é gi, "hkoséng"

gâ é nghut lhê.

<sup>17</sup> Haû mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga tái jáng, yhangmoq gi, maú byuq bùm bekô nghut ri.

*Saduke Pé, Yesuq Lé Myî Chyam É Hkyô*  
*Mht 22:23-33; Luk 20:27-40*

<sup>18</sup> Haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô.

<sup>19</sup> Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byî ri. <sup>20</sup> Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. <sup>21</sup> Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haû eq rajung za dut byuq bê nghut ri. <sup>22</sup> Haú nhiktâng wuì nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haû le châng shi ló byuq bê nghut ri. <sup>23</sup> Haû mù luí, haû dum dui toq é buinyì má, myiwe myhí haû gi, hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

<sup>24</sup> Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú?

<sup>25</sup> Haû shi byuq bê bang dum dui toq é hkûn gi, myi byi myi yû hkyô joq lo rá a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. <sup>26</sup> Shi é mai dum lhoq dui toq

é hkyô eq séng luî, Mosheq kê tô é laiká má lhang, haû nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.' ✧ ga kê tô é lé, nungmoq a nghap wú kó lhu? <sup>27</sup> Garai Gasang gi, shi bê bang é Garai Gasang a nghut, dui nyi bang é Garai Gasang sheq ru nghut lhê. Nungmoq gi, shut dik bekô nghut ri." ga tâi ri.

*Ahkyak Dik É Jep É Tarâ*

*Mht 22:34-40; Luk 10:25-28*

<sup>28</sup> Tarâ sará rayuq gi, lé lô mù, yhangmoq tâi htîng lhum nyi kê é lé, lé wó gyô ri. Yhang gi, haú bang lé, Yesuq rago tû tâi nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhu?" ga myi ri.

<sup>29</sup> Haû jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhûng é Yhumsîng Garai Gasang za, Garai Gasang nghut lhê. <sup>30</sup> Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq, náng é wum-o banshoq èq, chyitdap râ lhê.' ✧ gâ é nghut lhê. <sup>31</sup> Hau htang lhum gi, 'Náng gûng lé nàng chyitdap é su, náng é chyangnâm mâ é bang lé le chyitdap aq.' ✧ gâ é nghut lhê. Shî í lhum htoq kê é tarâ gotû a joq lo." ga yhangmoq lé tû tâi ri.

<sup>32</sup> Haú hkûn, tarâ sará haú yuq gi, "Gyo naû bê, Sará ê! Garai Gasang rayuq za nghut lhê, gotû a nyi lo ga nàng tâi é gi, têng ri. <sup>33</sup> Garai Gasang lé, náng é myit nhiklhum banshoq èq le, náng é sê gyo

✧ **12:26** Htoq Ló 3:6 ✧ **12:30** Tarâ Pun 6:4-5 ✧ **12:31** Nhung 19:18

é nyan banshoq èq le, náng é wum-o banshoq èq le, chyitdap râ lhê gâ é eq, náng gùng lé nàng chyitdap é su, náng é chyangnâm mã é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga taî ri.

<sup>34</sup> Yesuq gi, yhang hpaqchyî bo é dông tû taî nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé taî kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

### *Hkrisduq Gi, Ó Yuq É Yhangzo?*

*Mht 22:41-46; Luk 20:41-44*

<sup>35</sup> Yesuq, noqkuq yhûm má mhoqshit nyi é hkûn lé taî é dang gi, "Haî mù, haû tarâ sará pé gi, Hkrisduq lé, Dawiq é yhangzo za nghut lhê gâ akô lhú? <sup>36</sup> Dawiq gi, Chyoiyúng Woi-nyí èq taí nhang é má,

'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taî ri.'<sup>☆</sup>

gâ ri. <sup>37</sup> Haû mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lhú?" gâ ri.

Byù hpûng mó gi, Yhâng é dang lé, gabú myit èq gyô nyi bum akô nghut ri.

<sup>38</sup> Yesuq gi, mhoqshit uchyang taî é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gài pé má lhom shi-kyâm yù râ lé le, <sup>39</sup> tarajong pé mã é

☆ 12:36 Hkya-on 110:1

ahkyak dik é zùng jang pé eq poî pé mâ é réng é zùng jowò pé má myang zùng râ lé le, ô nau nyi bum akô. <sup>40</sup> Yhangmoq gi, chuimó pé é yhûm-yò pé lé hpyoq zo hpyoq shuq kôluî, kyû hîng hîng dúng shit mhaú é bang nghut akô. Haú su é bang gi, dam byî é je riyhang hui zo kó râ nghut lhê." gâ ri.

### *Chuimó Myhí Kat É Alu Ngùn*

#### *Luk 21:1-4*

<sup>41</sup> Yesuq gi, alu sidek nàm má zung to mù, no-  
qkuq yhûm mâ é alu sidek haú má, byù moq mó  
ngùn kat nyi é lé wú nyi ri. Sùt wó bang myo  
myo gi, ngùn ga-myhó myhó kat bum akô. <sup>42</sup> Haú  
hkûn, myung é chuimó myhí rayuq gi, lé mù, gyi  
htingchap ngùn zo í chap lé kat ri.

<sup>43</sup> Yesuq gi, Yhâng é chángzô pé lé wut yù mù,  
"Ngò, nungmoq lé teng za taí kôlé, shî myung  
é chuimó myhí gi, góbang banshoq htoq má je  
myo kat bê nghut ri. <sup>44</sup> Haú góbang banshoq gi,  
yhumsîng agùn agó wó é mâ é lé, lé kat akô; yhang  
kúm gi, myùng sù nghut kôle, yhâng é asak lé baú  
râ ngùn banshoq lé, kat bê nghut ri." ga taí ri.

## 13

### *Ló Htâng Buinyì Má Dut Lò Râ Hkyô*

#### *Mht 24:1-21, 29-35; Luk 21:5-33*

<sup>1</sup> Yesuq, noqkuq yhûm mai htoq ló é hkûn, Yhâng  
é chángzo rayuq gi, "Sarâ ê, wú aq; hkâ-í ko é  
luqgok pé! Hkâ-í hkik é yhûm pé!" ga Yhang lé taí  
kat ri.

<sup>2</sup> Haú hkûn, Yesuq gi, "Nàng, yhûm mó shí pé lé  
myàng lhê a nghut lhú? Luqgok shí pé gi, rachâm

htoq racham lhang a kê lhum loshoq, hpyoq hpyi pyâm é hui râ nghut lhê." gâ tû taî ri.

<sup>3</sup> Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, <sup>4</sup>"Haú hkyô pé gi, hkâ-nhám dut lò râ lhu? Haú dut lò râ hkûn, hkasû é kumlhá htoq lô râ nghut lhê lhu? Ngamoq lé taî kyô wú laq." ga Yhang lé baú myí akô nghut ri.

<sup>5</sup> Haú mù, Yesuq gi, yhangmoq lé, "Nungmoq lé, ó yuq eq le a wó shuí nghoq sháng gaq, sidiq nyi keq. <sup>6</sup> Hkâsu mù gâ le, 'Ngò gi, haú yuq\* nghut lhê.' ga, Ngá myîng lé lhang é byù myo myo pò htoq lô mù, byù myo myo lé shuí nghoq kó râ nghut lhê. <sup>7</sup> Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyi gi, a nghut shi. <sup>8</sup> Byù ra-myû eq ra-myû, mingdán ralhum eq ralhum majan zân lhum lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apûn awang za ru nghut ashî.

<sup>9</sup> Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má é ap pyâm kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá myîng é yanmai, mauzau wuî eq hkohkam pé é hí má, saksé dông yap ra kó râ nghut lhê. <sup>10</sup> Haú gabú danglù gi, amyû banshoq lé hí hko kyo ra râ nghut lhê.

---

\* **13:6** Haú yuq gâ é gi, Hkrisduq lé gâ é nghut lhê.

11 Nungmoq gi, chyup yu é hui luî, jep huî é hkûn, haî taí râ lé, hkâ-myt chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

12 Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyâm nhâng kó râ nghut lhê. 13 Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôlhâng, jihtûm jé shoq wó hkam jân nyi é sù gi, hkyi yu é hui râ nghut lhê.

14 'Haú lhoq hten lhoq hpyoq é achag achyut hkyô<sup>✧</sup> gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hfang doq lô kó sháng gaq. 15 Yhumhkûng htoq má nyi tô é sù gi, yhúmhaú mâ é zè haî lé le, a ló gyó wang yù lo sháng gaq. 16 Yò má nyi tô é sù gi, yhâng é buhîng lé a ló taû yu nyi lo sháng gaq. 17 Haú buinyi pé má, zogùng dut é myiwe wui eq naú huq ashî nghut é înu wui gi, hkâ-í yhang wuîhke bekó nghut ri myhi-nhung. 18 Haú hkyô gi, gyoqmyò má a dut sháng gaq, kyûdûng nyi keq. 19 Hkâsu mù gâ le, Garai Gasang, mingkan lé hpan tô é hkûn mai ahkuî jé shoq, hkâ-nhám le a dut wú shî é wuîhke jamjau mó gi, haú buinyi pé má dut lò râ nghut lhê; haú su é hkyô gi, htângnùng má hkâ-nhám le dum dut lo râ a nghut. 20 Buinyi haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhâng,

✧ 13:14 Dan 9:27; 11:31; 12:11



Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaú pyám byi bê nghut ri. <sup>21</sup> Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjíng kó. <sup>22</sup> Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá pé eq laklai kumlhá pé lé kut shit kó râ nghut lhê. <sup>23</sup> Haú mù, nungmoq sidiq nyi keq; ahkyíng a jé shi mai, ngò, nungmoq lé, jung hkanmó taí kyô nyi gù nghut lhê.

<sup>24</sup> Buinyi haú pé má, wuîhke jamjau haú pé laí é htâng,

'Buì gi, noq byuq mù, lhamó gi, a tsô dut byuq râ nghut lhê;

<sup>25</sup> kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huî bùm kó râ nghut lhê.'✠

<sup>26</sup> Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkang eq le, gyó lé lo é lé, byu pé byu-myàng kó râ nghut lhê. <sup>27</sup> Hau htâng má, Yhang gi, Yhâng é mau-mang lagyô pé lé nhang kat mù, maumyî chyûn hkanmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsíng yù nhâng râ nghut lhê.

<sup>28</sup> Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, buì nyé nám chyâng lò bê lé, nungmoq sê lhê. <sup>29</sup> Haú eq ra-jung za, shí hkyô pé dut nyi é lé, nungmoq myàng

---

✠ 13:25 Esai 13:10; 34:4

kôjáng, Yhang gi, chyáng bê nghut mù, hkúmdong má lhang nghut nyî bê hkyô lé, nungmoq sé lo keq.  
<sup>30</sup> Ngò, nungmoq lé teng za taí kôlé, shí pyat má é byu pé a ban shi byuq shimá, haú hkyô pé banshoq dut byuq râ nghut lhê. <sup>31</sup> Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyî râ nghut lhê.

*Haú Buinyì Eq Ahkyíng Lé, Ó Le A Sé*

*Mht 24:36-44*

<sup>32</sup> Buinyì eq ahkyíng haú lé gi, ó yuq le a sé; mauhkûng htoq mâ é maumang lagyô pé lhang a sé; haú Zo le a sé; haú Íwa za ru sê lhê. <sup>33</sup> Haú mù, nungmoq gi, ahkyíng haú hkâ-nhám jé râ lé, a sé kô é yanmai, sidiq nyî keq! Machya nyî keq! <sup>34</sup> Haú gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byî to mù, hkum zúng sù lé le, machya nyî râ matú pying to luí, yhâng yhùm lé, haú dui-nhâng zoshâng wui chyáng ap pyâm to mù, byìn we shut htoq ló byuq é sù eq pung ri.

<sup>35</sup> Haú mù, haú Yhumsîng hpó gi, myinhâng laq, myín gunggàm laq, woqtûn hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyî keq. <sup>36</sup> Haú a nghut jáng, Yhang, dân loq tung tau jé lo é hkûn, nungmoq yhup myhî tô é lé, lo myang pyám râ nghut lhê. <sup>37</sup> Ngò, nungmoq lé, 'sidiq machya nyî keq,' nghú taí é eq rajung za, yuq hkangmó lé le, taí é nghut lhê." ga taí ri.

## 14

*Yesuq, Xú But Byi Huí É Hkyô*

*Mht 26:1-16; Luk 22:1-6; Yhn 11:45-53; 12:1-8*

<sup>1</sup> Ahkuî, haû Lhoqlhai Poî eq múncchi a kat é Muk Zo Poî jé râ í nyí za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yû mù, sat pyám râ matú, hkyô ho nyi akô nghut ri. <sup>2</sup> Nghut kôlhang, yhangmoq gi, "Byu pé gabyông lô kó abe, poî gyoro má gi, a kut shi sháng." ga taî akô.

<sup>3</sup> Yesuq gi, Behtani wà má nyi é manggâm dap wú sù Simûn é yhûm, siboî má nghe zung tô é hkûn, myiwe myhí rayuq gi, nardu amyit mai za sai yu é, gyai hpaû é namngón xû bo é alabasta (luq hpyû) bông yu lé lô mù, bông haú lé lâng hkyui luî, namngón xû haú lé Yesuq é ulhum má hut gyun byî ri.

<sup>4</sup> Haú má nyi tô é bang ra-am gi, wú nhik-yô é myit èq, rayuq eq rayuq taî lhum kô é gi, "Haî mù, namngón xû lé aha agó kut pyâm lhê laq? <sup>5</sup> Haú namngón xû lé, denari\* sùm sho èq ung luî, myùng bang lé byî le ge lhê mhaî!" gâ akô. Yhangmoq gi, myiwe myhí hau lé le, gyai chôm tân akô.

<sup>6</sup> Nghut kôlhang, Yesuq gi, yhangmoq lé, "Myiwe zo haú lé, hkâtân nyi kó; haî mù, yhang lé i-myit lhoq myo nhang nyi akô lhú? Yhang gi, Ngá é ahtoq má ge é hkyô kut bê nghut ri. <sup>7</sup> Haú myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shî má nungmoq eq rahá ayang nyi nyi râ sù a nghut. <sup>8</sup> Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é

---

\* **14:5** Denari rachap gi, byù rayuq é ra-nyí lhê é zuihpau eq wui ri.

gi, Ngá gûng lé yhum râ matú, hí hen lajâng tô é ru nghut lhê. <sup>9</sup> Ngò, nungmoq lé teng za taí kôlé, haû gabú danglù lé mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô râ nghut lhê." ga taí kyo ri.

<sup>10</sup> Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pê chyáng e ri. <sup>11</sup> Haú bang gi, haú hkyô lé lhom wó gyo kôjáng, gyô gabú luí, yhang lé ngùn byi râ ga, danggidiq byi akô. Haú mù, yhang gi, Yesuq lé ap pyám râ hkyô ho nyi bê nghut ri.

### *Yhumsing É Myinzang*

*Mht 26:17-30; Luk 22:7-23; Yhn 13:21-30*

<sup>12</sup> Haú htungli joq é eq rajung za, Lhoqlhai Poí hkungga sauzo jaú byi é, múnchi a kat é Muk Zo Poí sâng-hi nyí má, Yesuq é chángzô pé gi, Yesuq lé, "Nàng zo râ Lhoqlhai Poí lé, ngamoq hkâmá ê món to râ lhú?" ga myí akô.

<sup>13</sup> Haú mù, Yhang gi, chángzo í yuq lé, "Nungnhik, myuq hkaú shut wang ló keq, wui yambú waq é byù rayuq lhom hui râ nghut lhê; haú hkûn, nungnhik gi, yhâng htâng cháng keq. <sup>14</sup> Haú yuq, wang ló é yhûm mâ é yhumsîng lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lhú ga, Sará myí nhang kat ri.' nghû taí keq. <sup>15</sup> Haú hkûn, hen to gû nghut é, ahtoq mâ é wap mó lé lhom tûn shit râ nghut lhê. Wap haú má, nga-nhûng é matú ê hen to keq." ga taí luí, nhang kat ri.

16 Chángzo haú nhik gi, htoq e ló mù, myuq hkaû má wang e ló le, Yesuq taí kat é eq roq za ê myâng kômù luí, Lhoqlhai Poí lé, món to bekô nghut ri.

17 Myinhtâng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri.

18 Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám râ nghut lhê." ga taí ri.

19 Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

20 Haú hkûn, Yhang gi, "Haú yuq gi, haú raxe í yuq mâ é rayuq nghut lhê. Ngò eq rahá, hkoq shí má muk jùmzo sù nghut lhê. 21 Haú Byu Yhangzo gi, Yhang eq séng luí kâ tô é eq rajung za, shî râ za nghut lhê. Nghut kôlhang, haú Byu Yhangzo lé ap pyâm é sù gi, dingnyé wó ri; haú yuq gi, a hku lé le lhang, je ge ri.

22 Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

23 Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq ban-shoq bang gi, haú lé yù shuq akô nghut ri.

24 Yesuq gi, yhangmoq lé, "Shî gi, byù myo myô é matú htoq pyâm é, dangshikaq eq séng é Ngá sui nghut lhê. 25 Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

<sup>26</sup> Yhangmoq gi, hkya-on mahkôn ralhüm ban hkôn jáng, Tsanlun Bùm shut htoq e ló bekô nghut ri.

*Petruq He-ngik Râ Hkyô Lé, Te Tai É Hkyô  
Mht 26:31-35; Luk 22:31-34; Yhn 13:36-38*

<sup>27</sup> Yesuq gi, yhangmoq lé, "Nungmoq lhunglhâng bang gi, myit lingbat kó râ nghut lhê; hkâsu mù gâ le,

'Haû sau zúng sù lé, Ngò bat sat pyám mù, sau pé gi, lhoq pyo pyâm é hui kó râ nghut lhê.'<sup>☆</sup> ga kê tô ri. <sup>28</sup> Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má e ló lág râ nghut lhê." ga tai ri.

<sup>29</sup> Haû hkûn, Petruq gi, "Góbang banshoq myit lingbat kôlhâng, ngò gi, myit lingbat râ a nghut." ga tai kat ri.

<sup>30</sup> Haû mù, Yesuq gi, "Ngò, nàng lé teng za tai lé, hkû-nyí, hkû-myín yhang jáng, woq í dâm a tûn shimá, nàng, Ngo lé sum dâm he-ngik pyám râ nghut lhê." ga tû tai ri.

<sup>31</sup> Nghut kôlhâng, Petruq gi, "Ngò, Nàng eq rahá shî râ dut kôlhâng, Nang lé ngò he-ngik pyám râ a nghut." ga zuq zuq tai ri. Góbang banshoq le, haû su ga châng tai bum akô nghut ri.

*Get-samane Gâ é Jowò Má Kyûdûng É Hkyô  
Mht 26:36-46; Luk 22:39-46*

<sup>32</sup> Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû ê dûng nyi é u lé, shî má zùng lág keq." ga tai ri.

<sup>33</sup> Yesuq gi, Yhang eq rahá Petruq, Yakuq, Yohan pé lé, shuí chûng ri. Haû hkûn, Yhang gi, myit gyai

<sup>☆</sup> 14:27 Zhk 13:7

a ngón é eq myit wuîhke é hui mù, <sup>34</sup> yhangmoq lé, "Ngò gi, shî râ í yhang myit yón nyi ri; nungmoq gi, machyâ luî, shí má láng nyí keq." ga taî ri.

<sup>35</sup> Yesuq gi, haû mai ratsuí zo sô ê mù, myigùng má gop byên to luî, ahkyíng haú lé ge lhoq lhai pyám byî le gi, Yhâng chyáng mai lhoq lhai pyám byi râ matú, <sup>36</sup> "Aba, † Áwa ê, Nàng gi, haî le wó dut é Sû nghut lhê. Góm ‡ shí lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdùng ri.

<sup>37</sup> Hau htâng, Yhang gi, Yhâng é chángzô pê chyáng dum taû lo le, yhangmoq yhup myhî to kô é lé lo myang ri. Haû mù, Yhang gi, Petruq lé, "Simun, nàng yhup ngón nyi lhê lhú? Razup za lháng a wó machya nyi lhú? <sup>38</sup> Gunlaú é a hui sháng gaq, machyâ luî, kyûdùng nyi keq. Haû woi-nyí gi, kâm nyi kôlhang, gungsho gi, wum nyhôm nyi ri." ga taî ri.

<sup>39</sup> Yesuq gi, radàm dum ê mù, hí lé dúng é dang lé za, ê dung ri. <sup>40</sup> Yhang dum taû lo le, yhangmoq gi, myoqkuq lai kô é yanmai, yhup myhî to láng kô é lé, lo dum myang ri. Yhangmoq gi, Yhang lé haî taî râ a sé dut byuq akô nghut ri.

<sup>41</sup> Yesuq gi, sum dâm nghû râ lhîng má, yhangmoq chyáng dum taû jé lô mù, yhangmoq lé, "Nungmoq gi, ahkuî jé shoq yhup ngón nyi ashî kô lhú? Gé bê! Haû ahkyíng gi, jé bê nghut luî, haû Byu Yhangzo gi, yubak dap bâng é loq má ap pyâm

---

† **14:36** Aba gâ é gi, Aramaik dang dông "Áwa" gâ é lichyúm nghut lhê. ‡ **14:36** Góm gâ é gi, Yesuq, jamjau hui râ hkyô eq shî râ hkyô lé, taî nau é nghut lhê.

é hui râ nghut bê. <sup>42</sup> Toq keq! Ló loşáng hkoi! Ngo lé ap pyám râ sù gi, jé lé lô bê nghut ri." ga taí ri.

*Yesuq, Chyup Yû Huí É Hkyô*

*Mht 26:47-56; Luk 22:47-53; Yhn 18:3-12*

<sup>43</sup> Yesuq, dâng nyo nyi ashî u lé, haû chángzo raxe í yuq má bo é Yudaq gi, haû hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

<sup>44</sup> Yesuq lé ap pyâm râ sù gi, yhangmoq lé, "Ngò bopuq puq é sù gi, haú yuq nghut bê; Yhang lé chyup yû mù, zúng shuí ló keq." ga kumlhá byí to bê nghut ri. <sup>45</sup> Yudaq gi, Yesuq chyáng hkyê za ê mù, "Rabai ê." ga taí luí, Yhang lé bopuq puq byí ri. <sup>46</sup> Haú hkûn, yhangmoq gi, Yesuq lé chôm zúí zìng mù, chyup yû bekô nghut ri. <sup>47</sup> Haû mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>48</sup> Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lhú? <sup>49</sup> Ngò gi, nyí wuí, nungmoq eq rahá nyi luí, noqkuq yhûm má mhoqshit byí nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyúmdang pé gi, dik ra râ nghut lhê." ga taí ri. <sup>50</sup> Haú hkûn, haû chángzô pé gi, Yesuq lé tô pyâm to kôluí, h pang byo byuq bekô nghut ri.

<sup>51</sup> Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn, <sup>52</sup> yhang gi, buhîng lé hkyut hkyô pyâm to mù, gùngchîn h pang ló byuq bê nghut ri.



*Yudaq Byìn Tú Wapdoq Má Jéyáng Huí É Hkyô*  
*Mht 26:57-68; Luk 22:54-55, 63-71; Yhn 18:13-14, 19-24*

<sup>53</sup> Yhangmoq gi, Yesuq lé, hkyangjong mó chyáng shuî e akô; haû hkyangjong agyi pé lhunglhâng bang, suwún wuî eq tarâ sará pé le, lé zup zîng bum akô. <sup>54</sup> Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

<sup>55</sup> Haû hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haî le a myàng kó nghut ri. <sup>56</sup> Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

<sup>57</sup> Hau htâng, ra-am gi, toq yap mù, a têng é saksé hkám kô é gi, <sup>58</sup> "Yhang gi, 'Byu loq èq saî é noqkuq yhûm shî lé, Ngò hpyoq hpyi pyám mù, sum nyî gyoro má, byu loq èq a saî é, gotû ralhum dum saî râ nghut lhê.' ga taî é lé, ngamoq wó gyô ri." ga akô. <sup>59</sup> Nghut kôlhang, yhangmoq é saksé gi, a tsûng lhum kó nghut ri.

<sup>60</sup> Hau htâng má, hkyangjong mó gi, yhangmoq é hí má toq yap mù, "Nàng, haî le a tù taî luq? Shí bang, Nang lé mara hun nyi é saksé gi, hká dông nghut lhê lhú?" ga luî, Yesuq lé myî ri. <sup>61</sup> Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lhú?" ga dum myî ri.

<sup>62</sup> Haú hkûn, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam§ má zung tô é lé le, mhuthtui ji mù, mauhkûng mai lé lo é\* lé le, nungmoq myàng kó râ nghut lhê." ga taí ri.

<sup>63</sup> Haú hkûn, hkyangjong mó gi, yhâng é bu lé lâng cheq pyám mù, "Nga-nhúng, hai saksé râ ashí lú? <sup>64</sup> Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akô lú?" ga myí ri; yhangmoq banshoq bang gi, shí gíng sù nghut ri ga, chôm myit huí akô.

<sup>65</sup> Haú mù, ra-am gi, Yhang lé sôkan byé gyun é eq, myoq má nghop pyám byi luí, loqtsup èq htui byí lhê kut mù, "Nang lé ó yuq htui é, myiqhtoi htoí wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

*Yesuq Lé, Petruq He-ngik Pyâm É Hkyô*

*Mht 26:69-75; Luk 22:56-62; Yhn 18:1-18, 25-27*

<sup>66</sup> Petruq gi, wàng hkaú má nyi tô é u lé, haú hkyangjong mó é dui-nhâng zoshâng myhí rayuq jé lé lo ri. <sup>67</sup> Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

<sup>68</sup> Nghut kôhang, yhang gi, "Nàng taí é hkyô lé, ngò, sé le a sé, gyo le a sê gyo." ga he pyám luí, wâng hkúmdong shut htoq e ló bê nghut ri.†

---

§ **14:62** Loqyo hkyam gâ é gi, ahko ahkáng wó é jowò lé gâ é nghut lhê. \* **14:62** Mhuthtui ji mù, mauhkûng mai lé lo é gâ é gi, Danielaq 7:14 má bò lhê. † **14:68** Chyúmding ra-am má Haú hkûn jáng, woq tún bê nghut ri gâ é le bo ri.

<sup>69</sup> Dui-nhâng zoshâng myhí haú gi, Petruq lé, haú má dum myàng jáng, awui ayàm má yap tô é bang lé, "Shí yuq le, haú hpúng má lom é sú rayuq nghut ri." ga dum taí ri. <sup>70</sup> Petruq gi, radàm dum he pyâm ri; hau htâng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng má é byù rayuq hkyak nghut lhê." ga taí akô.

<sup>71</sup> Haú hkûn, yhang gi, yhânggùng yhang nhing luí, "Haú nungmoq taí é byù lé, ngò a sé." ga dakam ri.

<sup>72</sup> Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tân shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taí é dang lé, myit bún kat mù, wum kat ngau ri.

## 15

### *Pilat Hí Má Yesuq Jé Nyi É Hkyô*

*Mht 27:1-2, 11-26; Luk 23:1-5, 13-25; Yhn 18:28-19:16*

<sup>1</sup> Haú napkyó noq za má, hkyangjong agyi pé gi, suwún wuî, tarâ sará pé, Yudaq byìn tú wapdoq gón bang eq rahá kut, chôm bóng yû kômù, Yesuq lé tuí yû luí, shuí htoq é kômù, mauzau Pilat chyáng é ap byí akô nghut ri.

<sup>2</sup> Pilat gi, Yesuq lé, "Nàng gi, Yudaq byu pê é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga, tû taí ri.

<sup>3</sup> Haú hkyangjong agyi pé gi, Yhang lé mara gyai myo shoq chôm hun akô. <sup>4</sup> Haú mù, Pilat gi, Yesuq lé, "Wú aq, yhangmoq, nàng lé mara haú myhó hun nyi le, nàng, haí le a tû taí lhú?" ga myí ri.

<sup>5</sup> Nghut kôlhang, Yesuq gi, haî le a tû taí kut jáng, Pilat gi, maú byuq bê nghut ri.

<sup>6</sup> Haû Lhoqlhai Poî u lé, mingbyû wuì dúng é htóng byû rayuq yuq lé, mauzau mai lhaq lhoq htoq byi byi kut é htông joq ri. <sup>7</sup> Haú hkûn, Barabaq gâ é byù rayuq gi, gumlau gabyông é hkûn, byù sat é gumlau bang eq rahá, htóng gyó tô ri. <sup>8</sup> Byù hpûng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

<sup>9</sup> Haû mù, yhang gi, "Yudaq byu pê é hkohkâm lé nhang htoq kat byi râ lé, nungmoq ô nau akô lhú?" ga myî ri. <sup>10</sup> Pilat, haû su ga myî é gi, haû hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri. <sup>11</sup> Nghut kôlhang, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haû byù moq mó lé i-myit lhoq toq byî akô.

<sup>12</sup> Pilat gi, "Haû jáng, nungmoq mai Yudaq byu pê é hkohkâm ga sù yuq lé, ngò hkâsu kut râ lhú?" ga yhangmoq lé myî ri.

<sup>13</sup> Haú hkûn, yhangmoq gi, "Yhang lé tapzîng má jén sat pyám aq." ga chôm garu akô.

<sup>14</sup> Haû jáng, Pilat gi, "Haî mù luí lhú? Yhang haî kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garû lo bum akô nghut ri.

<sup>15</sup> Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byî kat bê nghut ri.

*Gyezô Pé Gi, Yesuq Lé Rhoi É Hkyô*

*Mht 27:27-30; Yhn 19:2-3*

<sup>16</sup> Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang ló kômù, gyedap gón lé ji tsîng yu akô. <sup>17</sup> Hau htâng, yhangmoq gi, Yesuq lé buhîng nè radung hut byi mù, zujanmaú saî yù kôluî, Yhâng é ulhum má tsung byî akô. <sup>18</sup> Hau htâng, yhangmoq gi, "Yudaq byu pê é hkohkâm hpó ê! Chyung hîng xê hîng nyî sháng gaq ô!" ga wut garû akô. <sup>19</sup> Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luî, Yhâng hí má hkyihput htuaq mù, paî mhaú akô nghut ri. <sup>20</sup> Yhangmoq gi, Yhang lé rhoi jihkyoi ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi luî, tapzîng má jén sat pyám râ matú, Yhang lé shuí htoq e ló bekô nghut ri.

*Yesuq Lé Jén Pyâm É Hkyô*

*Mht 27:31-44; Luk 23:27-43; Yhn 19:17-27*

<sup>21</sup> Alesander eq Ruhpu nhiktang é yhângwa, Kurni myuq byû nghut é Simun ga sù gi, yosô wà mai lò mù, haú jowò mai lai ló ri. Haú hkûn, gyezô pé gi, yhang lé, tapzîng waq nhang akô nghut ri. <sup>22</sup> Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri). <sup>23</sup> Hau htâng, yhangmoq gi, Yhang lé, mura\* eq nyhô tô é tsibiyiq wing huq akô; nghut kôlhang, Yhang gi, a lhom shuq byi nghut ri. <sup>24</sup> Hau htâng má, yhangmoq gi, Yhang lé tapzîng má jén

\* **15:23** Mura gi, chi wó kut jung xù nghut lhê.

tap to kôluî, Yhâng é mebu pé lé, hkyîn shosé shê mù, âng é dông gam yu pyám byî akô nghut ri.

<sup>25</sup> Yhangmoq, Yesuq lé tapzîng má jén tap pyâm é hkûn gi, napkyó gau hkyíng nghut bê nghut ri.

<sup>26</sup> Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri.

<sup>27</sup> Yhangmoq gi, damyaq í yuq lé le, Yhâng é loqyo hkyam shut rayuq, loqpaî hkyam shut rayuq kut,

tapzîng htoq má jén tap tô akô nghut ri. <sup>28</sup> (Haû gi, "Yhang gi, yubak dap bâng chyáng nghap lhôm é hui bê nghut ri."✧ gâ é Chyúmdang lé lhoq dik

é nghut ri.)† <sup>29</sup> Hkyô sô lai ló é bang gi, nyhap é dông u-ngut ngut mù, taí kô é gi, "Noqkuq yhûm lé

hpyoq pyám luî, sum nyí gyoro má dum wó saí lhê ga Sû ê! <sup>30</sup> Náng gùng náng hkyi yù luî, tapzîng mai

gyó lò wú aq mhai!" ga akô nghut ri.

<sup>31</sup> Haû eq rajung za, hkyangjong agyi pé eq tarâ sará pé le, yhangmoq hkaû má, "Shí yuq gi, góbang

lé hkyi yù sù nghut kôlhâng, Yhânggùng yhang gi, a wó hkyi yù nghut ri myhi-nhung! <sup>32</sup> Nga-nhúng

wó myâng mù, lumjîng râ matú, shî, Israelaq byu pé é hkohkâm, Hkrisduq gi, tapzîng mai gyó lo wú

sháng gaq." ga, Yhang lé rhoî dang taí akô. Yhang eq rahá tapzîng má jén tap to huî é su nhik le,

Yhang lé rhoî dang taí akô nghut ri.

*Yesuq, Shi É Hkyô*

*Mht 27:45-56; Luk 23:44-49; Yhn 19:28-30*

<sup>33</sup> Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq

---

✧ **15:28** Esai 53:12 † **15:28** Bun zo shî gi, chyúmding axau ra-am pé má za bo é nghut lhê.

bê nghut ri. <sup>34</sup> Myinhâng sum hkyíng jé é hkûn, Yesuq gi, "Eloi, Eloi, lama sabakhtani." ✧ ga, htê mó èq garû kat ri. Haú é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lhú?" gâ é nghut ri.

<sup>35</sup> Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

<sup>36</sup> Haú hkûn, byù rayuq gi, din e ló mù, wuimaù lé tsibiyiq wíng chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhung chôm láng wú sháng." ga taí ri.

<sup>37</sup> Yesuq gi, htê mó èq garû kat luí, kâng byit byuq bê nghut ri.

<sup>38</sup> Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri. <sup>39</sup> Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taí ri.

<sup>40</sup> Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. <sup>41</sup> Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byí é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

---

✧ 15:34 Hkya-on 22:1

*Yesuq Lé, Myhup Pyâm É Hkyô**Mht 27:57-61; Luk 23:50-56; Yhn 19:38-42*

<sup>42</sup> Haú nyí gi, Hên Lajang Buinyì (Bánno buinyì é hí nyí) nghut ri. Haú mù, myinhtâng jé lô jáng, <sup>43</sup> Yudaq uphkâng hpúng má bo é, aróng wó é, Garai Gasâng é mingdán lé lánng nyi é sũ, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé ê dúng ri. <sup>44</sup> Pilat gi, Yesuq shî bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shî teng bê lhú ga myí ri. <sup>45</sup> Shî teng bê hkyô lé, shô up gyezaú chyáng mai wó sê yù jáng, Pilat gi, Yesuq é gungsôm lé yù râ ahkáng, Yosep lé byi kat ri. <sup>46</sup> Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaú má ê kat tô ri. Hau htâng, yhang gi, luphkum má, luqlông èq lhêng chí pyâm tô ri. <sup>47</sup> Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

**16***Dum Dui Toq Lo É Hkyô**Mht 28:1-8; Luk 24:1-12; Yhn 20:1-10*

<sup>1</sup> Bánno buinyì lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi râ matú namngón jung ê wui akô. <sup>2</sup> Bánno buinyì htang napkyó bui htoq lo é hkûn yhang, yhangmoq gi, lup shut e lô akô. <sup>3</sup> Yhangmoq gi, "Luphkum mâ é luqgok lé, ó yuq chyûn lhêng pyám byi râ lhú?" ga, rayuq eq rayuq taí lhum akô.



<sup>4</sup> Nghut kôlhang, yhangmoq tu wú kat kô é hkûn, luqlong haû gi, lhoq lhêng to lánq é lé, myàng akô nghut ri; luqlong haû gi, gyai kô é nghut lhê.

<sup>5</sup> Yhangmoq gi, lup hkaû má wang ê kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

<sup>6</sup> Haú hkûn, haú yuq gi, "Hkâgyuq dân kó! Nungmoq gi, haû tapzîng má jén sat huí é, Nazaret wà byù Yesuq lé ho akô, a nghut lhú? Yhang dui toq ló bê! Yhang gi, shí má a nyì lo. Yhang lé, lheq tô é jowò lé wú wú keq. <sup>7</sup> Ahkuí, nungmoq gi, ló mù, 'Yesuq gi, nungmoq hí má, Galile mau shut so lánq râ nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myâng kó râ nghut lhê.' nghú, Yhâng é chángzô pé eq Petruq lé ló taí kyo keq." ga lhom taí kat ri.

<sup>8</sup> Haû mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

### *Yesuq Htoq Shit É Hkyô*

*Mht 28:9-10, 16-20; Luk 24:13-53; Yhn 20:11-23; Lagyo 1:6-11*

<sup>9</sup> Yesuq gi, Bánno buinyì htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mâ é Mariq lé hí htoq shit ri. <sup>10</sup> Mariq haû gi, ló mù, haû Yesuq eq nyi lai lò bê bang, yón ngau nyì kô é hkûn, haú hkyô lé ló taí kyô ri. <sup>11</sup> Yhangmoq gi, Yesuq dum

dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jing kó nghut ri.

<sup>12</sup> Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri. <sup>13</sup> Haú nhik gi, taû lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jing byi kó nghut ri.

<sup>14</sup> Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

<sup>15</sup> Hau htoq agó, Yesuq gi, yhangmoq lé, "Mingkan jam shoq htoq ê mù, waxâng zo wui lhunglhang lé, haú gabú danglù hko kyo keq. <sup>16</sup> Lumjing mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjing é sù ó yuq nghut kôle, mara byi é hui râ nghut lhê. <sup>17</sup> Lumjing é bang wó kut shit râ kumlhá pé gi, Ngá é mying lé lang luí, nat gâng pé lé wó hkat htoq kó râ eq laklai é mying pé lé dat nyò kó râ nghut lhê; <sup>18</sup> yhangmoq gi, lhangmuí pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jang, nò bang ge byuq kó râ nghut lhê." ga taí ri.

<sup>19</sup> Haú Yhumsing Yesuq gi, yhangmoq lé dang ban taí é htâng má, mauhkung shut shuí toq yu é hui luí, Garai Gasâng é loqyo hkyam má zung to bê nghut ri. <sup>20</sup> Hau htâng, haú chángzô pé gi,

htoq ê mù, jowò hkangmó má mungdang ê hko  
kyô akô nghut ri; haû Yhumsîng gi, yhangmoq eq  
rahá nghut nyî mù luî, Yhâng é mungdang têng é  
hkyô lé tûn shit râ matú, yhangmoq lé, kumlhá pé  
wó kut é a-tsam byî é nghut ri. Amen.

# **Chyoiyúng chyumlaiká: dangshikaq asik; Zaiwa**

## **New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

23f9fc55-a8a4-59ef-9513-707ec336b0ee